


SI CRISTO NADAYAG DIHA SA KAUGALINGON NIYANG PULONG

 Atong iduko ang atong mga ulo. Ginoong Jesus, ang Magbalantay sa hamiling Panon, hilabihan kaayo kami ka utangan nganha Kanimo, Ginoo, nga dili Ka gayud namo mabayran tungod sa gugma nga Imong gipaagay diha sa among mga kasingkasing. Gibati namo ang pagka-dili gayud takus sa diha nga ginaduko namo ang among mga ulo ug nagatindog sa Imong presensiya. Nagahangyo kami Kanimo nga hinloan Mo kami sa tanang mga kasaypanan ug sa tanang kasal-anan. Nagaampo kami nga Imo karon pagalig-onon ang among mga lawas. Daghan ang mga masakiton ug mga nag-antus, sama sa makita dinhi, bahin niining mga panyo ug mga paghangyo nga naitawag diha sa telepono ug gikan sa tanan nang dapit.

² Ug nagatoo kami nga patapos na kami sa kasaysayan sa niining kalibutan karon, ug dili magdugay magakahanaw na ang panahon ngadto sa Eternidad, ug gusto namo nga mamahimong andam alang nianang taknaa. Mao kana kon ngano nga ania kami nagkatigum karong buntaga, ang mangandam alang nianang orasa. Gisultihan ako nga daghan ang mga nakakonekta diha sa mga telepono karong buntaga sa tibuok nasud, gikan sa mga baybayon ngadto sa mga baybayon. Asa man paingon ang among mga tingog, hinaut nga mapanalanginan kanang gamay'ng pundok. Ayoha ang mga masakiton sa ilang taliwala, ug nagaampo ako nga Imong hinloan ang ilang mga kalag gikan sa tanang kadautan. Ug tabangi kami dinhi niining buntaga, sa tabernakulo, nga amo usab matagamtaman kanang dakung prebilibiyo.

³ Ug nagapangamuyo kami nga Ikaw magasulti kanamo karon pinaagi sa Imong sinulat nga Pulong, ug hinaut nga igapadayag kanamo sa Espiritu ang mga butang nga among gikinahanglan, samtang nga nagkatigum kami karon sa tibuok nasud, may pagbati nga mga kabus lang kami nga mga tawo, apan adunay puwesto diha sa mga tinubos na, tungod nga nanagtoo kami kang Jesus Cristo. Itugot kanamo kining mga butanga, Ginoo.

⁴ Ug pagmatapos na namo ang panerbisyo ug manguli na kami sa among nagkalainlaing mga poluy-anan sa tibuok nasud, makaingon kami, sama niadtong mga naggikan sa Emmaus, “Dili ba ang atong mga kasingkasing nagdilaab man sa sulod nato samtang nagsulti Siya kanato ubay sa dalan?”

⁵ Karon, Amahan, nasayod ako nga unsa man ang akong igasulti siguradong dili gayud igo, sa—sa maayo kaayong

mga Cristohanon sa tibuok nasud karon nga nagapaminaw, mamahimo kini—mamahimo gyud kining dili igo. Dili kini mamahimong usa ka butang nga makaingon ako nga makahatag og unsa man nga kaayohan, tungod kay pare-pareho lang kaming tanan. Tawo lang kami, mga mortal. Apan tugoti ang gamhanan nga Balaang Espiritu nga maoy mosulti; hinaut nga gunitan Niya ang Pulong ug ipadayag gayud ang Iyang Kaugalingon. Nagapaabot kami Kaniya karon, sa Ngalan ni Jesus. Amen.

Makapanglingkod na kamo.

⁶ Medyo ako’y . . . nakurat mismo. Giingnan ko ang akong asawa, kung nagapaminaw man siya, didto sa Tucson, wala gyud ko naghunahuna nga magkaaduna ako og unsa man nga panerbisyo sa pagbalik ko; ug wala gani ako magdala og mga sinina. Ug giingnan ko ang akong umagad nga babaye, giplantsa niya ang akong amerikana, ug ingon ko, “Mopabilin lang ko sa luyo sa pulpito, nga . . . Dili man nila mahibal-an nga lahi nga klase ang akong karsones ug lahi usab ang amerikana.” Kadto ang mga gisul-ob ko sa balay. Pero, si Meda, naplantsa niya diay ang akong kamiseta ug tanan na, busa ang tanan . . . Dili gyud magkabalaka; okey na ang tanan.

⁷ Karon, adunay paghangyo kanato dinhi, nga aduna og bililhon kaayo nga igsoong lalaki . . . Ug nagatoo ako nga—nga ang Prescott, nagatoo ako, nakakonekta karong buntaga, didto sa—sa Prescott, Arizona. Ang amahan ni Igsoon nga babayeng Mercier paanhi na dinhi unta sa tigum, sa nasabtan ko, ug gikinahanglan siya nga dalhon sa hospital tungod sa usa ka ataki sa kasingkasing, si Igsoong Coggins. Ug, usab, si Igsoong Junior Jackson, siguro anaa siya dinha sa sunod nga radyo, o sa sunod dinha nga telepono didto sa Clarksville o sa New Albany, ug nahospital ang iyang amahan, sa nasabtan ko, adunay makuyaw nga operasyon tungod sa kanser sa atay. Busa gusto natong hinumdumon gayud sila diha sa atong mga pag-ampo. Ug karon adunay uban pa dinhi, usab, apan ayaw na natong maglangan pa sa oras. Nasayod ang Dios sa tanan mahitungod kanila, busa iampo nato sila karon.

⁸ Minahal nga Dios, samtang nga kanang bililhon, tigulang, nangunot na nga mga kamut sa tawong, si Igsoong Coggins, usa ka tigulang na nga beterano diha sa natad, ang . . . naghigda didto sa hospital karong buntaga, sa kon asa man, nga nagaantus tungod sa ataki sa iyang kasingkasing. Dios, ang kasingkasing sa nianang makalooloy nga tigulang miagi na sa daghang mga kalisdanan. Nagaampo ako, Dios, aron matabangan siya. Itugot kini. Sama siya sa . . . Gimahal niya ang kinabuhi sama kanamong tanan, ug gusto niyang mabuhi pa. Ginoong Dios, itugot kini. Kami sa tibuok nasud nagaampo alang kaniya sa Ngalan ni Jesus, nga Imong ayohon ug Imo siyang ipalingkawas.

Nagatoo kami nga Imo gayud buhaton; nga makatambong siya mismo sa panagtigum.

⁹ Nagaampo kami alang kang Igsoong Jackson, nga ang bililhon niyang papa naghigda didto nga anaa na karon sa ngilit sa kamatayon, ug nga naghatud sa kalibutan og usa ka maayong anak sama ni Junior. Ako—ako—ako nagaampo, minahal nga Dios, nga Imo siyang pagaayohon. Nahibalo ako nga daw sa imposibli kini. Ang mga anaa sa medisina, ang mga doktor, sila—dili na sila makahibalo kung unsay buhaton sa niana nga matang nga sakit. Apan mahinumduman namo si Igsoong Hall, usab, sa diha nga ang pinakamaayo sa mga doktor dinhi nag-ingon, sa Louisville, miingon, “Aduna siya’y pipila na lang ka oras nga mabuhi,” tungod sa kanser sa atay. Ug buhi siya sa karon, ug baynte-singko na ka tuig kadto, tungod sa Imong grasya. Busa nagaampo ako nga Imong pagaayohon si Igsoong Jackson karon, Ginoo, tugoti nga ubanan siya sa Imong grasya ug kalooy.

¹⁰ Ug ang tanan niining dakung tipun-og sa mga panyo ug mga tela ug mga butang nga gipahimutang dinhi sa paghangyo; nakaila Ka kanilang tanan, Amahan. Nagaampo ako nga ihatag Mo ang kaayohan alang kanilang tanan. Sa Ngalan ni Jesus Cristo. Amen.

¹¹ Karon sa pagsugod, karong buntaga, wala ako naghunahuna nga makaanhi, sa una pa lang, niadtong miaging Dominggo. Ug dayon usab, sa pagpahibalo namo niini, mianhi ako. Ako ang gipawali ni Igsoong Neville! Ug dayon gipahibalo namo nga moanhi ako karon, ug wala pa kini napahibalo ngadto sa mga tawo sa tibuok nasud. Ug aduna kita niining sistema sa telepono karon, nga maayo, maayo kaayo. Manglingkod lang ang mga tawo sulod diha sa ilang panimalay o sa ilang . . . magtigum diha sa ilang mga lugar, sa ilang kasimbahanan, ug uban pa, ug makapaminaw na sa panerbisyo. Ginapasalamatan ko kana.

¹² Karon makita ko ang mga napahimutang dinhi, adunay daghang mga hangyo niining nangaging semana, mahitungod sa akong giingon sa miaging Dominggo sa Mensahe. Siguro nalimtan ko na karon kung unsa ang giulohan ko niadto. Apan nag-ingon ako og usa ka butang mahitungod sa pagbayad sa inyong mga utang. Ug nahibalo na mo, bisan unsa pa man ang isulti mo, masaypan kini sa pagsabot sa kadaghanan. Dili tungod kay ilang . . . dili nga dili nila gusto masabtan kini, kondili nga dili mo lang gayud kini masabtan.

Ug karon may usa nga moingon, “Kinahanglan ba kitang mopalit og sakyanan?” O, “Unsa ba’y kinahanglan kong . . .”

Karon, dili ingon niana ang gisulti ni Jesus, o sa Biblia bahin dinha, niadtong pag-ingon, “Dili kamo mangutang sa bisan unsa kang bisan kinsa.” Kana maoy mga dugay na nga mga utang nga mahimo man ninyong bayaran. Bayari ninyo kini. Kini dili’y . . . Kana mao ang dili pagpangutang og

bisan unsa kang bisan kinsa. Wala kini nagapasabot. . .Aba, may utang man kita sa atong pagpangabang, sa atong mga balayronon sa telepono, kita'y. . .ug unsa pa man. Kita—utang nato kanang mga butanga, ug ginabayaran nato ang mga niini. Apan, ang sa una pa nga dugay na nga utang nga mahimo man ninyong bayaran, bayari na kini. Kita n'yo? Karon, ayaw pasagdi nga aduna og unsa man nga nakabinbin diha kanimo nga sama niana.

¹³ Nahinumduman ko ang panahon sa diha nga nagkasakit ako, niadtong batan-on pa ako. Ug migawas ako sa hospital nga may utang ako og mga duha ka libo ka dolyares. Ug aduna kaniadto og usa ka botika dinhi, ni Mr. Swaniger, nakautang ako kaniya og mga tulo o upat ka gatus ka dolyares, mga balayronon sa tambal. Wala gani siya nakaila kanako. Ug ang maong tawo. . . giadtoan ko siya. Wala ako nakaila kaniya. Ug iya lang kadto ginapahatud didto, bisan pa man, wala gayud siya nagdumili nga ihatud kadto. Ug ingon ko, “May utang ako kanimo.” Ug ingon ko. . . nagtoo ko, nga si Swaniger. . . Si Mr. Mason ang atua kaniadto sa Court Avenue ug Spring.

Ug ingon ko, “May utang ako kanimo. Ug ako—maluya pa ako kaayo, apan paningkamotan ko nga makatrabaho. Karon, kung dili man ako makabayad pa kanimo. . .” Bag-o lang ako nahimong Cristohanon kaniadto. Ingon ko, “Unang butang, Mr. Mason, ingon nga katungdanan ko sa Dios, utang ko Kaniya ang akong ikapulo. Gusto kong bayaran Siya sa akong mga ikapulo, una.” Ug ingon ko, “Dayon ang sunod ko nga katungdanan mao ang pagbayad sa akong mga utang.” Ingon ko, “Masakiton ang akong amahan, ug siya'y. . .Ug kami adunay. . .Napulo kaming mga anak sa pamilya.” Apan ingon ko, “Akong. . .Kung dili man ako makabayad kanimo og sobra sa baynte-singko sentimo sa nianang balayronon, matag suweldo; kung dili man ako makabayad kanimo bisan na lang sa baynte-singko sentimo, moagi ako ug sultihan ka bahin niini. Sultihan ta ka, ‘ako—ako—dili ko kini mabayaran sa niining higayona.’” Karon, tungod sa tabang sa Dios, nabayaran ko kadto tanan. Kita n'yo? Ingon niana ang pasabot ko, kita n'yo? Dili nga moingon ang usa ka tawo. . .

¹⁴ Oh, usa ka Cristohanon dinhi sa iglesia migawas usa ka higayon ug may gipabuhat kaniya dinhi nga usa ka sakyanan, ug mianha ang tawo. . .Nag-ingon ang maong tawo, “Bayaran ta ka. Suweldo ko pag-Sabado,” o ingon niana. Ug wala gyud niya siya gibayaran. Ug daghan nang mga semana ang nangagi, ug wala gayud siya gibayaran, wala man lang may gisulti. Ug—ug miduol kanako ang lalaki ug gipangutana ako, miingon siya. . . Kita n'yo, nagareplektar kini batok sa iglesia. Nagareplektar kini batok kang Cristo.

Kung dili ka pa makabayad kaniya, adtoi siya, ingna, “May utang ako kanimo, ug pagabayaran ta ka. Cristohanon

ako, apan ako—ako gyu'y. . . Dili ko mabayaran kini sa pagkaron, kinahanglan kong. . . Utang ko kini.” Ug, timan-i, nalista usab kini diha sa mga libro sa Dios, kabalo ka na, nga may utang ka. Busa kana'y. . . Ginapaninguhaan ko, para sa akong kaugalingon ug para kanatong tanan, sa pagpaninguha nga mamahimong andam, kay nasayod kita nga nagakaduol na kita sa usa ka butang, haduol na kaayo sa usa ka butang nga magakahitabo. Busa gusto nato nga mamahimong andam. Sa diha nga ang Pag-abot sa Ginoo nagakahaduol na gyud karon, gusto nato nga mamahimong andam para nianang taknaa.

¹⁵ Karon gusto natong mangandam ug maghisgot karon bahin sa usa ka gamay'ng hilisgutan dinhi nga napili ko para niining buntaga, pinaagi sa tabang sa Ginoo. Ug maghisgot kita sa ingon ka hamubo lang nga mahimo nato, tungod sa nakakonekta nga mga tawo. Nagalaum ako nga kamong tanan adunay. . . ang tanan diha sa tibuok nasud, adunay maayong tiyempo sa buntag sama nga aduna kami dinhi sa Indiana. Aduna kami karon og maayo, mabugnaw, maanindot nga tiyempo sukad niadtong ulan. Ug maayo gyud kini.

¹⁶ Karon gusto kong mobasa gikan sa Basahon sa Mga Hebreohanon, sa unang kapitulo; ug sa Basahon ni San Juan, sa unang kapitulo. Mga Hebreohanon 1:1 ngadto sa 3, ug San Juan 1:1, para sa usa ka teksto. Usa ka pagtoon diha sa mga Kasulatan ang akong hilisgutan karong buntaga. Karon basahon nato ang Mga Hebreohanon 1:1.

Ang Dios, nga sa makadaghang higayon. . . sa nagkalainlaing mga paagi misulti kaniadto sa karaang kapanahonan ngadto sa mga ginikanan pinaagi sa mga propeta,

Apan niining kaulahiang mga adlaw nagsulti nganhi kanato pinaagi sa iyang Anak, nga iyang gitudlo na nga manununod sa tanang mga butang, pinaagi kang kinsa usab gibuhat niya ang kalibutan;

Nga sanglit mao man ang dan-ag sa iyang himaya, ug. . . mao gayud nga dagway sa iyang pagkamao, ug sa nagatuboy sa tanang mga butang pinaagi sa pulong sa iyang gahum, sa diha nga nakabuhat siya sa paghinlo sa atong mga sala, milingkod sa toong kamot sa Halangdon sa kahitas-an;

Pagkatahum kaayo nga balasahon! Karon sa San Juan 1:1.

Sa sinugdan mao ang Pulong, ug ang Pulong kauban sa Dios, ug ang Pulong mao ang Dios.

¹⁷ Karon, ug ang akong teksto karong buntaga maoy: *Si Cristo Nadayag Diha Sa Kaugalingon Niyang Pulong*. Karon, kung asa man ako miabot sa pagdesisyon nga maghisgot bahin niini, maoy tungod nga. . . Sa paghibalo nga kung unsa ma'y atong isulti kinahanglan dili nga magsulti-sulti lang tungod nga nagkatigum

kitang tanan aron nga dili basta na lang magsulti og bisan unsa, pero kinahanglan nga usa kini ka butang nga magapalig-on sa mga tawo, tungod kay magaaagi kita sa mga makuyaw, malimbongon nga mga tubig. Nagaagi na kita sa mga niini. Ug usahay siguro ingon niana kini kaninyo sama nga ingon niana kini kanako, nga mora'g ingon niana, nga kadaghanan niini, pagkakuyaw kaayo niini.

¹⁸ Bag-o lang ako nagpakigsulti sa usa ka batan-ong ministro ug sa iyang asawa, sulod sa lawak, dili pa lang dugay. Ug pareho silang gina-nerbiyos sama sa uban pa sa kalibutan, sama sa tanang uban pa nga mga tawo sa kalibutan. Ingon ko, “Timan-i, may usa ka sumbag si Satanas nga paingon na kanimo.” Dili igsapayan kung kinsa ka man, ang Dios . . . Aduna siya’y katungod alang nianang usa ka sumbag. Asa man ang gustohon mo, nianang sumbag; ang mabuta, o mamahimong usa ka masakiton tungod sa arthritis diha sa usa ka lingkuranan, o mamahimong nerbiyoso? Kita n’yo? Aduna siya’y usa ka dapit kon diin mahimo niya kamong sumbagon. Aduna siya’y katungod sa nianang abli nga dapit. Karon, mao kana ang dapit nga kinahanglan ninyong matabunan sa tanang panahon. Ug ang makita gayud kining nerbiyosong kapanahonan nga atong gikapuy-an karon!

¹⁹ Ug ang mga teyp sa miaging semana, siguro, magapadayag kaninyo sa dakung makalilisang nga mga butang nga atong pagahisgotan usa sa niining mga adlaw pag-aduna na kita og igong lugar, mahitungod sa pag-abli nianang kaulahiing mga hampak nga igabubo ibabaw sa kalibutan, sa nianang mga Panaksan, diay, nga ginabubo ang maong mga Panaksan, ug ang Pito ka Mga Dalogdog, ug kanang makalilisang nga mga talanawon nga magaabot sa kalibutan. Ang tawo karon, ug ang mga katawhan sa karon, anaa na sa pagka-nerbiyoso nga kahimtang; ang tibuok kalibutan!

²⁰ Basaha ninyo kining miaging bulan nga *Reader’s Digest*, makita ninyo ang mao nga hilisgutan dinha; mahitungod kini kang Billy Graham, ang bantugan nga ebanghelista. Gikapoy siya og ayo nga dili na niya mapahigayon pa ang iyang mga panagtigum, ug siya—miadto siya sa Mayo’s clinic para sa pagpa-eksamen sa iyang lawas. Wala ma’y problema diha kaniya, dili lang siya makapanglihok-lihok og ayo. Ug gipa-jogging nila siya; paugnat sa kusog. Naga-jogging siya og usa ka milya kada adlaw.

Ug dayon padayon nga nagaingon ang maong artikulo nga ang siyensya nagpamatuod kono sa karon, nga ang mga bata, kining gagmay pa nga mga batang lalaki ug mga babaye, “nagaabot na sila sa ilang katung-an nga pangidaron bisan mga baynte pa lang ang panuigon.” Ug pagnag-baynte singko na, sa makadaghang higayon, sa daghang mga sitwasyon, naga-

menopos na ang mga babaye, sa edad nga baynte-singko anyos pa lang.

Wala ko kabalo kung nahibaloan na ba ninyo kini o wala, apan pipila ka gabii ang milabay nakigsulti ang Balaang Espiritu dinhi sa panagtigum, usa ka batang babaye ang naglingkod dinhi, eksaktong ingon niana ang problema sa maong bata sa dihang gitawag kini. Gitan-aw ko siya sa makaduhang higayon, gitan-aw pag-usab, ug nakita ko kung unsa’y problema. Sa hunahuna ko, “Dili mahimong mahitabo kini; bata pa kaayo kana nga babaye.” Apan nagmenopos na siya, mga baynte ka tuig pa lang ang panuigon, baynte-tres, mora’g ingon niana. Kita n’yo?

²¹ Miabot ang akong inahan ug ang inyong inahan sa nianang kahintang nga mga kuwarenta’y-singko hangtud singkwenta na ang pangidaron. Miabot ang akong asawa sa ingon nianang kahintang mga traynta’y-singko na ang edad. Karon miubos na kini ngadto sa baynte. Nagakadaut na ang tibuok kaliwatan sa tawo. Bueno, kung kining pisikal nga bahin sa atong lawas nagakadaut na nga sama niana tungod sa pag-kaon og hybrid nga mga kalan-on, tungod sa mga kabalaka, nga maoy nagadaut niini, dili ba nagapadaut usab kana sa selula sa utok? Kung ingon-ana makita nato kung unsa nga ang mga kababayen-an manglakaw na diha sa dalan, nga hubo. Makita nato kung unsa nga mahimo nilang magpadagan diha sa—sa mga kadalanan og usa ka gatus ug baynte ka milya kada oras, tanan na niining mga butanga. Miabot na kini sa punto kon diin nga ang tibuok nasud, ang tibuok kalibutan, dili lang kini nga nasud, kondili sa tanan na nga dapit, wala na sa ilang pangutok.

²² Ug dayon sa diha nga maablihan na nato kana, kon itugot sa Ginoo, ang mahitungod nianang Pito Ka Mga Panaksan ug mapakita kadtong makalilisang nga mga butang. Mamahimo nga wala na sa hustong pangutok ang mga tawo, pagkahuman og pipila ka panahon, hangtud hunahunaon nila nga nakakita sila og mga hulmigas nga ingon ka daku sa usa ka bukid. Paantuson niini ang mga kababayen-an; magkaaduna og mga dulon sa yuta, nga hatag-as ang mga buhok, aron paantuson ang mga babaye nga nagapaputol sa ilang buhok; buhok ingon sa mga buhok sa babaye, nga nangdunghay; ug hatag-as ang mga ngipon, ingon sa mga ngipon sa leon; ug may mga suyod sa ilang ikog, sama sa usa ka tanga, ug—ug uban pa, aron paantuson ang mga tawo sa yuta. Apan mamahimong ulahi na kaayo nianang tungora nga mohimo og bisan unsa man bahin niini. Magpakamatarung na kamo mismo karon. Kita n’yo? Mga pagpaantus!

²³ Ug sa diha nga ginahisgotan nato kadtong mga lingin sa miaging Dominggo, mahitungod sa kung unsa nga ang lima ka mga sensya diha sa panggawas nga dapit. Kana ang agianan pasulod, lima ka mga sensya ngadto sa lawas. Adunay usa lang ka agianan nga maagian mo pasulod ngadto sa lawas, kana’y

pinaagi nianang lima ka mga sensya: igtatan-aw, igitilaw, igbabati, igsisimhot, ug igdudongog. Wala na'y uban pa nga agianan aron makontak ang—ang lawas.

²⁴ Diha sa sulod sa tawo mao ang tawong gitawag nga espiritu, ug aduna siya'y lima ka mga sensya: panghunahuna, hunahuna . . . ug hunahuna, ug gugma, ug konsensiya, ug uban pa. Sige.

²⁵ Karon, dili kamo mahimo nga maghunahuna pinaagi sa inyong lawas. Nagahunahuna kamo pinaagi sa inyong hunahuna. Ug dinha kon diin daghan kaayo, sa mga Cristohanon, basta na lang nagahunong. Ug mahimo sila, sama gayud sa mais diha sa umahan ug sa bunglayon sa maong umahan, mahimo silang madihogan sa mao ra nga Balaang Espiritu nga ang matuod nga magtotoo gikadihogan usab.

Apan sa kinasuloran niana, ang sunod nga dapit, ang ikatulong dapit, mao ang kalag; ug kana ang predestinado sa Dios. Dinha kon diin napahimutang ang binhing-semilya, sa sulod dinha.

²⁶ Ug, hinumdumi, kung mokuha ako og usa ka amorseko ug pikason kini, isumbak sa sulod niini ang kinauyokan sa—sa trigo ug ibutang kini dinha, ilubong kini, magapatubo kini og trigo gikan sa maong amorseko; bisan unsa pa man ang anaa sa gawas, unsa pa man ang mga emosyon.

²⁷ Sa karon, adunay hilabihan nga pagkalibog mahitungod sa kapanghimatuuran sa Espiritu Santo, ug uban pa. Mahimong sundogon ni Satanas ang bisan unsa man nga matang sa gasa nga aduna ang Dios, apan dili niya mahimong dalhon kana nga Pulong, ang Pulong sa Pulong. Dinha siya napakyas kaniadto sa tanaman sa Eden. Dinha siya kanunay nagakapakyas. Dinha sila, ang teyp mahitungod sa “mini, nga mga dinihogan,” o mga dinihogan; mahimo silang madihogan sa Espiritu, nagasulti og laing mga dila, nagasayaw, nagasinggit, nagawali sa Maayong Balita, ug mga yawa sa gihapon.

Ang importante ang anaa sa sulod! Karon hinumdumi, nag-ingon si Jesus, “Ang tanan nga gihatag Kanako sa Amahan moari gayud Kanako. Walay makahimo sa pag-ari Kanako gawas lamang kon siya pagadanihon una sa Amahan.”

Karon, nahisgotan na nato sa hilisgutan, aron ipakita nga sa . . . Didto na kamo sa inyong kaapu-apu-apuhan, sa kaniadto pa, kung paghisgotan sa pisikal. Kung ingon-ana, ingon niana kamo sa pisikal nga kahimtang, sa kinaiyahan. Usahay may matawo nga bata sa usa ka pamilya, nga pula ang buhok. Makurat niini ang amahan, tungod kay wala man siya may nahibaloan, sa iyang mga kaparyentihan, nga pula ang buhok, o sa inahan man niini. Apan kung subayon mo gyud pabalik og pipila ka henerasyon, makaplagan mo nga aduna kaniadto og usa nga pula ang buhok. Padayon nga nagatungha

kana nga kaliwat, ug motungha ka na lang diha sa kinaiyahan nga iya sa usa nga nagagikan sa kaniadto.

Sama sa giingon sa Mga Hebreohanon sa ika-7 nga kapitulo, nga, “Kang Melquisedec, nagbayad si Abraham kaniadto og ikapulo ngadto Kaniya sa diha nga pabalik na siya sa pagpamatay kaniadto sa mga hari. Ug si Levi, nga nagadawat og ikapulo, nagbayad kaniadto og ikapulo,” tungod kay atua na siya kaniadto sa mga bat-ang ni Melquisedec didto sa . . . o, “sa mga bat-ang ni Abraham,” diay, sa diha nga natagbo niya si Melquisedec.

²⁸ Karon ingon niana sa gihapon kini. Kung ikaw usa ka anak sa Dios, ug kung ako usa ka anak nga lalaki sa Dios, o usa ka anak nga babaye sa Dios, atua na kita sa Dios sa sinugdanan pa lang. Ug sa diha nga si Jesus nahimo nga kahupnganan sa Pulong, kung ingon-ana atua na kita diha Kaniya, sa semilya nga porma. Sa gilansang Siya sa krus kaniadto, gilansang usab kita diha sa Iyang lawas. Sa diha nga nabanhaw Siya gikan sa mga patay, nabanhaw kita uban Kaniya. Ug karon, ingon nga naila nato kini, “karon gipalingkod kita uban Kaniya, sa mga langitnong dapit diha kang Cristo Jesus.” Kita n’yo? Kay Siya. . . Kita, kung kita mga anak nga lalaki ug mga anak nga babaye sa Dios, mga anak kita sa Dios, kung ingon-ana mga kinaiyahan kita sa Dios. Kung ingon-ana kita. . . adunay Kinabuhing Walay Katapusan. Ug ang Dios lamang ang maoy Kinabuhing Walay Katapusan. Kung ingon-ana, atua na kita Kaniya sa sinugdanan. Ug sa diha nga si Jesus nahimo nga mao ang kinatibuk-an nianang Pulong, kung ingon-ana kabahin na kita Kaniya kaniadto pa. Amen! Ingon niana kamo. Kana nga anaa dinha, wala’y yawa, wala’y mga gahum, wala’y bisan unsa man ang makapairog niini. Kana mao ang haliging-hikutananan sa kalag.

²⁹ Mahimo kang madihogan *dinhi*, diha sa espiritu, ug mangandoy, ug buhaton ang tanang uban pa niining mga butang. Apan kung paghisgotan na kining haliging-hikutananan nianang Pulong, dili ka gayud mairog gikan dinha. Manggunit mismo kini nga lig-on ug matinuuron, sa nianang Pulong, sama sa mahimo niini. Gawas niana, bisan unsa pa ang buhaton mo, nahisalaag ka sa gihapon.

³⁰ Kanang Kapanahonan sa Igleseang Laodicea, “hubo, buta, makalooloy; wala gani nakahibalo niini.” Kita n’yo, kini walay. . . Kini mao kanang dinihogan, dinihogan sa matuod nga Espiritu. Kita n’yo, mahimong mokunsad kanang Balaang Espiritu sa usa ka tawo, diha sa iyang espiritu. Apan ang iyang kalag mao ang iyang binhi; kana nga binhi mao ang Pulong. Kita n’yo? Ug unsaon pa. . . Dili ko igsapayan kung bisan unsa ka pa ka maayo magwali, kung unsa ka pa ka maayo sa pagbuhat *niini*, ug kung unsa ka pa maghigugma; usa ra kana ka mga agianan pasulod sa espiritu. Dili ka mahimong

maghigugma pinaagi sa imong lawas; nagahigugma ka pinaagi sa imong espiritu. Usa ra kana sa maong mga agianan. Ug mahimo kang maghigugma, ug bisan higugmaon pa ang Dios, ug dili sa gihapon mamahimong husto. Mahimo kang magpagula og mga yawa, ug magwali, ug buhaton kini nga mga butang; dili sa gihapon mamahimong husto. Mao kana ang giingon ni Jesus, miingon nga daghan ang magaduol nianang adlaw. Kana nga Pulong ang nagapanghimatuud niini!

Sa sinugdan mao ang Pulong, ug ang Pulong kauban sa Dios, ug ang Pulong mao ang Dios.

Ug ang Pulong nahimong unod, ug nagpuyo ipon kanato, . . .

³¹ Himatikdi, pagahisgotan ko kining hilisgutan sa Biblia, mahitungod sa, *Si Cristo Nadayag Diha Sa Kaugalingon Niyang Pulong*. Kon diin nahimo ko kini nga pagdesisyon, didto sulod sa akong kuwarto.

Usa ka suud nga tawo, ania siya tingali nagalingkod dinhi karong buntaga. . . Aduna ako og usa ka retrato nga gisab-it didto sa akong tulun-anan, usa kadto ka retrato nga ginama ni Hoffman nga *Head of Christ*, nga gisulat diha sa Beatitudes. Ug kon diin dinha nga moabot ka na sa dapit mismo sa buhok, medyo ilang giduut pa ang tinta sa pluma sa diha nga maagihan mo kana nga bahin. Dinha, dinha Siya, nga anaa sa Iyang Pulong, diretsong nagatan-aw; si Cristo diha sa Beatitudes. Usa ka tawo, kung kinsa man kadto, ginapasalamatan ta ka niini.

Ug adunay tawo nga nagdala usab niadtong retrato ug gibutang kini didto sa akong tulun-anan, bahin kang Elias nga nagakayab diha sa usa ka carro sa kalayo. Nagapasalamat kita sa niining mga butang. Sa makadaghang higayon, sa daghang mga tawo, wala lang ako'g higayon nga mahisgotan ug masulti kining mga butanga, apan nakita ko kini, igsoong lalaki, igsoong babaye. Ako'y—nasayod ako niini, ug nahibalo ang Dios niini.

³² Karon pagahisgotan ko na kining hilisgutan mahitungod sa: *Si Cristo Nadayag Diha Sa Kaugalingon Niyang Pulong*. Kung unsa nga, diha sa Beatitudes, atua ang retrato ni Cristo, mora og, anaa dinha mismo. Dinha ko nahunahunaan kini nga hilisgutan. Karon, si Cristo ug ang Pulong mao ra. Kita n'yo?

³³ Moingon sila, “Unsa man nga ang Biblia . . . ?” Ingon sa mga tawo. Nagabiyahe ako kaniadto uban sa usa ka tawo dili pa lang dugay. Miingon siya, “Hunahunaa kini. Kitang ania niining kalibutan, ingon nga kung unsa kita, ug nahibaloan lang nato o masulti lang nato nga naluwas kita tungod lang sa kung unsa nga hinimohimo sa Judio nga gitawag og Biblia.”

³⁴ Ingon ko, “Sir, wala ko kabalo kung nganong nasulti mo kana, apan wala ako nagatoo nga usa kana ka hinimohimo lang sa Judio,” ingon ko.

Miingon siya, “Bueno, nagaampo ka man, para man sa unsa ka nagaampo? Ako miampo kaniadto para sa *ingon-ani ug ingon-ana* ug sa pipila ka mga butang; wala ko man kadto nangaangkon.”

³⁵ Ingon ko, “Sayup ang imong pag-ampo. Dili gyud kita mag-ampo aron nga mausab ang hunahuna sa Dios; kinahanglan kitang mag-ampo aron nga mausab ang atong hunahuna. Ang hunahuna sa Dios wala nagkinahanglan og pag-usab. Kita mo? Kita mo, husto kini.” Ingon ko, “Dili sa kung unsa ang giampo mo . . .”

Aduna ko’y kaila nga usa ka batang lalaking Katoliko, nga usa ka higayon, naggunit og usa ka basahon-pangadyeanan, nga nagapangadye, ug aron nga mabuhi pa ang iyang inahan. Ug namatay ang maong inahan, ug iyang gilabay ngadto sa kalayo ang maong basahon-pangadyeanan. Bueno, kita n’yo, dili ko uyon sa basahon-pangadyeanan; apan, bisan pa man, kita n’yo, sayup ang inyong taras. Ginapaninguhaan ninyong tudloan ang Dios kung unsay buhaton.

Ang pag-ampo kinahanglan unta nga, “Ginoo, usaba ako aron nga mohaum sa Imong Pulong.” Dili nga, “Usaba,” dili nga, “Usaba ang Imong hunahuna. Ikaw ang mag-usab sa imong hunahuna.” Kita n’yo? “Usaba ang akong hunahuna alang ngadto sa Imong kabubut-on. Ug ang Imong kabubut-on nahisulat dinhi sa Libro. Ug, Ginoo, ayaw—ayaw tugoti ako nga mohawa hangtud nga Imo nang nahimo ang akong—akong hunahuna nga nahitul-id na nga sama gayud sa Imong hunahuna. Ug dayon sa diha nga ang akong hunahuna nahitul-id na nga sama diha sa Imong hunahuna, kung ingon-ana pagatoohan ko na ang matag Pulong nga Imong gisulat. Ug miingon Ka, dinha, nga buhaton Mo nga, ‘masigtabang ang tanang butang alang sa ikaayo’ niadtong mga nahigugma Kanimo. Ug nahigugma ako Kanimo, Ginoo. Kining tanan masigtabang alang gayud sa ikaayo.”

³⁶ Didto ako ning semana sa lungsod, nagpuyo didto sa pipila ka suod nga mga higala. Gipangutana ko ang uban kanila didto sa lamesa, kagahapon, sa nagakaon kami. Nanglingkod kami didto ug adunay gamay’ng . . . medyo gamay nga pagtuon diha sa Biblia. Naghisgot mahitungod sa gugma.

Ug may usa ka tawo ang nangutana kanako, ingon niya, “Nagatoo ako nga usa ikaw ka anticristo.”

³⁷ Ingon ko, “Kung kana ang makapahimuot sa akong Ginoo, ingon niana ang gusto kong mamahimo ako. Gusto ko nga mamahimo kung unsa man nga gusto Niya akong mamahimo. Gihigugma ko Siya. Ug kung kinahanglan man Niya akong itambog ngadto sa impiyerno, higugmaon ko gihapon Siya, kung moadto ako uban sa mao rang espiritu nga aduna ako karon.” Gitan-aw niya ako nga medyo natingala.

Nakita ko nga ang upat o lima kanila didto, mga batanon pa nga mga lalaki; batan-ong mga asawa, buutan nga mga babaye. Nasayod ako kung unsa nilang mga lalaki gimahal ang ilang mga asawa, busa ingon ko kanila, ingon ko, “Ania ang paagi sa pagtesting niini. Kung ang imong asawa, sa wala pa kamo naminyo. . . Karon, balikan mo, pananglitan ikaw. . . sa niining kinabuhi nga minyo na, nagdamgo ka nga minyo ka na; sa tinuod dili ka pa minyo, pero nagdamgo ka lang nga naminyo ka na. Ug nakamata ka, ug miadto ka ug giestorya mo kini sa imong uyab, ug ingon, ‘Kabalo ka, nagdamgo ako nga gikasal kita, ug nagkaaduna kita og mga anak. Nagkinabuhi kita nga malipayon, ug—ug nagahulat na lang sa Pag-abot sa Ginoo, ug tanan na.’ Ug dayon kining bayhana moingon kanimo, ‘Kabalo ka, nahigugma ako sa usa ka lalaki nga mas mahal ko pa kay kanimo. Mamahimong mas malipayon ako uban sa maong lalaki.’ Mahimo mo kaha, gikan sa imong kasingkasing, nga higugmaon siya sa igo nga makaingon ka, ‘Magapabilin ang mga panalangin sa Dios kanimo, mahal ko. Sige uban ka sa niining lalaki?’”

Karon, karon susiha kana, ang matag usa kaninyong mga lalaki o mga babaye. Kita n’yo? Bueno, kung tinuod ang imong paghigugma, buhaton mo kana, tungod kay may kaikag ka man para sa iyang kaayohan. Aba, nasayod ka nga mahimo mo siyang maasawa, mahimo kang magkinabuhi nga kauban siya, ikaw. . . Siya nga imong asawa; mamahimo siyang imong asawa. Makapakasal siya kanimo, apan dili siya magmalipayon. Mas magmalipayon siya. . . Ug dayon, kung nahigugma ka kaniya, kung ingon-ana gusto mo siyang magmalipayon.

Mao nga, kung unsa man ang kabubut-on sa Dios, tugoti nga mamatuman ang kabubut-on sa Dios, magmalipayon man ako niini o dili. Gusto kong magkinabuhi aron nga Siya mahimuot sa unsay akong ginabuhat. Busa susiha ang inyong—inyong katuyoan ug ang inyong motibo pinaagi niana; mahibaloan ninyo kung kamo ba’y nahigugma sa Dios o wala.

Unsa kaha kung moingon Siya, “Magaalagad ka ba Kanako kung igasalikway ta ka?”

“Higugmaon ko Ikaw, sa gihapon.”

³⁸ Busa, kung makita lang kana sa mga kaiglesiahan ug nga mahimong toohan kini sa nianang paagi, dili kini mamahimong usa nga maningkamot nga kalit nga agawon ang football gikan sa usa ka kauban nga nagadagan nga dala kini. Paga-protektahan pa niya kana. Kita n’yo? Sa diha, nga ang tinuod og matuod nga motibo ug katuyoan, dili kini mamahimo nga moingon ang usa, “Hoy, aduna usab ako *niini!* Ako, *ingon niini* ako, *ingon niini.*” Kita n’yo, dili magamit sa Dios ang maong tawo. Adunay daghan kaayong mga pagsundog-sundog nga nagasunod niini, ug si Satanas kana. Ug dili kana maamgo

sa mga tawo. Ilang paninguhaon nga agawon ang bola gikan sa tawong gikahatagan na niini. Pasagdi nga magpatungha ang Dios og usa ka ministerio ug bantayi kung unsa ka daghan ang magsundog-sundog niini. Kita n'yo? Kita n'yo?

³⁹ Karon, ang tinuod nga may gugma alang sa Dios, “Bisan unsa pa nga bahin ako, Ginoo, kung mahimo ko lamang ang magsulti og usa ka pulong para Niini, motabang nga maprotektahan Kini, tugoti akong buhaton kana.” Kita n'yo?

Mamahimong ingon niana usab bahin sa imong asawa. Kung tinuod gayud nga nahigugma ka kaniya, kita n'yo, nga dili kini usa—dili kini usa ka—usa ka gugmang *phileo*; usa kini ka gugmang *Agapao*, usa ka tinuod gayud nga gugma. Mahimo siyang makigpuyo sa uban, nga mas malipayon; dili pa kamo gikasal ha, siyempre, dili na ninyo mahimo.

⁴⁰ Ug, lain pa'y ako, sa mga tawong nagapaminaw sa niining mga teyp. Ang uban, daghan kaayo, ang nagpadala og sulat, miingon, “Aba, diha sa *Pagpakigminyo ug Pagpakig-Diborsyo, ingon niini* ang giingon mo ug *ingon-niana* ang giingon mo.” Gisulti ko na kini sa makadaghan nang higayon; kini nga mga teyp para lamang sa... Sa akong kongregasyon ako nagapakigsulti, igsoon. Wala ako'y katungdanan para sa mga gikahatag sa Dios kanimo aron bantayan; katungdanan ko kung unsa nga matang sa Pagkaon ang igapakaon ko alang niining mga tawo. Para lang kini sa niining tabernakulo. Kita n'yo? Karon, kung gusto sa mga tawo nga maminaw sa maong mga teyp, sa ila na kana. Apan nagasulti lang ako sa kung unsa ang gihatag sa Dios nganhi kanako. Ang ilang mga kasal-anan kadto nga gitangtang na.

Usa ka tawo ang misulat, ug miingon, “Buena, gibuhat ko na *kini* ug gibuhat ko na *kana*. Ingon mo ang among sala...” Ako—wala ako nagsulti niana.

Ingon ko, “Tan-awa kini sa ingon niini; para lang kini sa mga tawo mismo dinhi, sa mga tawo dinhi sa tabernakulo, ang kaugalingon ko nga panon.” Karon, kung ang mga tawo mag-hybrid og pagkaon ug ingon-anang mga butang dinha, kamo—pagkuha kamo og mga kapadayagan gikan sa Dios ug buhata ninyo kung unsa ang ginasulti sa Dios kaninyo nga buhaton. Mao usab ang pagabuhaton ko. Apan kini nga mga Mensahe alang lamang sa niining iglesia.

⁴¹ Karon himatikdi, balikan nato, kinahanglan nga aduna gayud kita og usa pa ka butang nga kinahanglan dinha kita makapanggunit. Usa ka butang nga kinahanglan mamahimong usa ka posteng-hikutanan, sa laing sinultihan, usa ka básihan. Ug gikinahanglan nga aduna ang matag usa og usa ka básihan o usa ka absolute. Miwali na ako bahin niini usa ka higayon, mga tuig na ang milabay, mahitungod sa usa ka absolute, usa ka dapit nga pang-kaulahi pang-pulong.

42 Sama sa usa ka umpire diha sa dula nga baseball, kung moingon siya nga strike, eksaktong ingon niana gyud kini. Bisan unsa pa ang tan-aw mo niini, nag-ingon na ang umpire nga strike kini. Moingon ka, “Ako—ako—ako. . . Dili kadto strike. Mipaingon kini. . . nakita ko ang. . .” Bisan unsa pa man kini, pagmoingon siya nga, “strike,” mao na kana, ingon niana gyud kini bisan unsa pa. Siya, siya mao ang básihan.

43 Ug ang suga pang-trapiko usa ka básihan, kung moingon kini, “Larga.” Moingon ka, “Bueno, ako, nagadali ako, kinahanglan kong. . .” Dili, dili. Nagaingon kini, “Magpabilin kang nakahunong samtang ang uban nagaagi.” Kita n’yo? Usa kini ka básihan.

44 Karon, kinahanglan nga aduna og usa ka básihan ang tanang butang nga inyong ginabuhat. Kinahanglan og adunay usa ka básihan pagmopili kamo sa inyong pangasaw-on. Kinahanglan adunay usa ka babaye nga kinahanglan ninyong pilion.

45 Karon, aduna gyu’y panahon kon diin, pagmopalit ka og sakyanan, unsa man nga matang sa básihan ang imong pagadesisyonan. Ford kaha, Chevy, Plymouth, sakyanan gikan sa gawas-nasud, unsa man kini, kinahanglan aduna ka og usa ka básihan.

Ug busa mao usab kini sa Cristohanong pagkinabuhi. Kinahanglan aduna gyu’y usa ka básihan.

46 Karon, kung ang usa ka tawo miingon, giadtoan ang usa pa ka tawo ug miingon. . . nadungog ang usa ka tawo nga nagaingon, “Bueno, kinahanglan kang mabautismohan,” ug kining tawhana wala pa gayud. . . Tingali, ang iyang, usa kini ka iglesia nga wala nagabautismo, nagapangwisik lang sila. Siguro, pananglitan, ang Methodist, nagabautismo sila kung hangyoon kini, sa pagsabot ko. O tingali ang. . . Ang mga Katoliko, sa tan-aw ko nagapangwisik lamang sila. Busa dayon kung—kung ang maong tawo nadungog ang usa ka butang mahitungod sa “paglusbog diha sa tubig,” bueno, wala niya kini masabtan; napadaku man siya nga usa ka Katoliko. Busa miadto siya sa pari, ug miingon, “Father, nasabtan ko nga angay kitang mabautismohan pinaagi sa paglusbog. Unsa man ang masulti sa atong iglesia bahin niana?”

47 “Aba, nagaingon ang iglesia nga—nga kita’y pagawisikan lamang.” Kung kana nga iglesia mao ang iyang básihan, mao na gyud kana. Human na ang tanang paglantugyai; ingon niana gayud ang gisulti sa iglesia, ug mao na gyud kana.

48 Unsa kaha kung ang. . . kung ang usa ka igsoong Baptist nadungog kita nga nagaingon nga nagatoo kita diha sa pagbautismo pinaagi sa “paglusbog”? Moingon siya, “Nagatoo ako niana.”

“Ug diha sa Ngalan ni ‘Jesus Cristo.’”

Karon, kini—kini nga miyembro sa iglesia mobalik ngadto sa pastor ug moingon, “Pastor, nadungog ko ang usa ka tawo nga misulti kanako nga kita kinahanglan magpabautismo pinaagi sa paglusbog, sige, pero diha sa Ngalan ni ‘Jesus Cristo.’”

⁴⁹ “Bueno,” moingon kini, “karon, tan-awon nato. Aba, nagaingon dinhi sa libro nga kita pagabautismohan lamang gamit ang ‘Amahan, Anak, Espiritu Santo.’” Kung kanang iglesiaha mao ang básihan, mao na gyud kana. Wala siya’y labot kung unsa man ang isulti ni kinsa man; kana man ang iyang básihan.

⁵⁰ Bueno, básihan ang matag denominasyon para sa ilang mga magtotoo.

Apan, para kanako, ug para sa mga ginalauman ko nga ginapangunahan ko ngadto kang Cristo, ug pinaagi kang Cristo, ang Biblia mao ang among básihan. Bisan unsa pa’y. . . Tungod kay, nag-ingon ang Dios, “Pasagdi nga bakak ang pulong sa matag tawo, ug ang sa Ako Kamatuoran.” Ug nagatoo ako nga ang Biblia mao ang básihan sa Dios. Bisan unsa pa ang ginaingon ni kinsa man; Kini mao ang básihan.

Ang Biblia dili usa ka libro sa mga sistema. Dili, sir. Dili Kini usa ka libro sa mga sistema, ni usa man ka kodigo sa moralidad. Ang Biblia dili usa ka libro sa mga sistema, sa daghang mga sistema, ug uban pa. Dili, sir. Dili Kini usa ka libro sa moralidad. Dili, sir. Dili ingon-niana Kini. Ni Kini usa ka libro sa kasaysayan, dili gayud. O, ni Kini usa ka libro sa teolohiya. Tungod kay, Kini mao ang kapadayagan ni Jesus Cristo.

Karon kung gusto ninyo nga mabasa kana, kamo nga adunay mga papel, isulat kini dinha, kana’y Pinadayag 1:1 ngadto sa 3, ingon nga, ang Biblia mao “ang Kapadayagan ni Jesus Cristo.”

⁵¹ Basahon nato kini samtang aduna pa kita’y oras. Nagtoo ko ang akong. . . wala ko’y daghan kaayong mga sinulat dinhi nga pagahisgotan. Kung magdugay pa ang Ginoo, aba, paninguhaon nato nga makapaghisgot pa gikan niini.

Ang Pagpadayag ni Jesus Cristo, nga gihatag ngadto kaniya sa Dios, aron igapadayag ngadto sa iyang mga ulipon ang mga butang nga kinahanglan magakahitabo sa dili madugay; ug gisugo niya ug gipaila kini pinaagi sa iyang manolunda ngadto sa iyang ulipon nga si Juan:

Nga mao ang nagpamatuod sa pulong sa Dios, ug. . . sa pagpamatuod ni Jesus Cristo, bisan sa tanang mga butang nga iyang nakita.

Bulahan siya nga nagabasa, ug sila nga nanagpatalinghug sa pulong sa niining tagna, ug nagabantay sa mga butang nga nahasulat niini: kay haduol na ang panahon.

⁵² Busa, ang Biblia mao ang bug-os nga kapadayagan ni Jesus Cristo. Ug gisulat Kini sa mga propeta. Mga Hebreohanon 1:1, sa . . . “Ang Dios, Nga sa karaang panahon nakasulti sa makadaghang higayon ngadto sa mga ginikanan pinaagi sa mga propeta, sa niining kaulahiing mga adlaw nagasulti kanato pinaagi sa Iyang Anak, si Jesus Cristo,” nga mao ang mga propeta kaniadto, silang tanan, pagtingubon. Si Jesus mao si Malaquias; si Jesus mao si Jeremias, Isaias, Elias. Ang kabug-osan kung unsa man sila kaniadto, anaa Kaniya. Ang kabug-osan kung unsa man kamo, ug ang kabug-osan kung unsa man ako, anaa diha Kaniya; mga Pulong, mga saksi sa Pulong.

Busa dili Kini usa ka libro sa mga sistema, usa ka kodigo sa moralidad, ni usa Kini ka libro sa kasaysayan, o usa ka libro sa teolohiya. Dili Kini ingon niana. Kondili usa Kini ka kapadayagan ni Jesus Cristo, ang Dios Mismo nga gipadayag, gikan sa Pulong ngadto sa pagka-unod. Ingon niana kung unsa Kini. Ang Biblia mao ang Pulong, ug ang Dios mao ang unod, ang Dios diha sa . . . Ang Dios mao ang Pulong, diay, ug si Jesus ingon nga mao ang unod. Kini ang kapadayagan, kung unsa nga ang Dios (ang Pulong) napadayag diha sa tawhanong lawas, ug nahipadayag kanato. Ug mao kana kon ngano nga nahimo Siyang Anak sa Dios; kabahin Siya sa Dios. Nasabtan ba ninyo? Karon, Siya dili . . . Ang lawas kabahin sa Dios, ingon nga usa kini ka Anak.

⁵³ Usa ka Anak, sama sa ginasulti sa mga Katoliko, “Eternal nga Anak,” ug sa tanang uban pa sa mga kaiglesiahan; dili masabtan ang maoy sinultihan. Kita n’yo? Dili mahimong Eternal, ug dayon usa ka Anak, tungod kay ang *Anak* usa ka butang nga “gipanganak.” Ug ang pulong nga Eternal, dili Siya mamahimong usa ka Eter- . . . Mahimo nga mamahimo Siyang usa ka Anak, pero dili Siya mamahimong usa ka Eternal nga Anak. Dili, sir. Dili kini mamahimong usa ka Eternal nga Anak.

⁵⁴ Karon, apan Siya mao ang Anak, gayud, nga ang tanan nga Pulong nga atua kang Jeremias, kang Moises, ug ang tanan niadtong mga Pulong, sama sa giingon Niya, “Naghisgot sila mahitungod Kanako.” Ang tanan niadtong matuod nga Balaang kapadayagan sa Pulong natigum diha sa usa ka tawhanong lawas, ug giputos Kini sa Dios diha sa unod. Mao kana ang hinungdan nga gitawag Siya’g “Anak,” ang hinungdan nga nagapanawag Siya og, “Amahan.” Aba, ingon niana kini ka yano, kung inyo lang tugotan nga ipasulod kini sa Dios sa inyong hunahuna. Kita n’yo? Ang Dios nga nahipadayag diha sa usa ka tawhanong lawas, himatikdi, nahipadayag gikan sa unod . . . o gikan sa Pulong ngadto sa unod. Kana’y San Juan 1:14, “Ug ang Pulong nahimong unod, ug nagpuyo ipon kanato.”

⁵⁵ Karon himatikdi kining Biblia. Miingon ang uban kanila, “Oh, bueno, gihimo Niini kini, gihimo Niini kana.” Apan sultihan ko kamo og usa ka butang, ato lang . . .

Adto ta sa kasaysayan sa Biblia, sa makadali lang, tanawon nato kung asa Kini gikan. Gisulat Kini sa kuwarenta ka nagkalainlaing mga manunulat. Kuwarenta ka mga kalalakenan ang nagsulat sa Biblia, sulod sa dise-sais ka gatus ka mga tuig, ug sa nagkalainlaing mga panahon, nga ginatagna ang pinaka-mahinungdanong mga panghitabo nga sukad nahitabo sa kasaysayan sa kalibutan, ug, sa makadaghang higayon, ginatus ka mga tuig sa wala pa kini mahitabo. Ug wala ni usa ka sayup diha sa tibuok nga saisentay-sais ka mga Basahon. Oh, sus! Walay tagsulat gawas sa Dios Mismo ang mamahimong ingon ka tukma gayud. Wala ni usa ka Pulong ang nagasumpaki sa usa pa.

Hinumdumi, sulod tanan sa dise-sais ka gatus ka tuig, nga gisulat ang Biblia, gikan kang Moises hangtud—hangtud sa pagkamatay ni—ni Juan didto sa isla, o sa Isla sa Patmos. Dise-sais ka gatus ka tuig, ug gisulat sa kuwarenta ka nagkalainlaing mga tagsulat; wala gani nagkailhanay sa usa'g usa, ug wala pa gayud nila Kini naila ingon nga mao “ang Pulong.” Ang uban kanila wala pa gani sukad nakita “ang Pulong.” Apan sa diha nga gisulat nila Kini, ug nasabtan sila nga mga propeta, dayon, sa diha nga gihiusa ang ilang mga propesiya, ang matag usa sa mga niini nagkatakdo gayud sa usa'g usa.

⁵⁶ Tan-awa si Pedro, nga nagmantala niadtong Adlaw sa Pentecostes, “Maghinulsol, ang matag usa kaninyo, ug managpabautismo sa Ngalan ni Jesus Cristo alang sa kapasayloan sa inyong mga sala.”

Si Pablo wala pa gayud may nadungog og bisan unsa man mahitungod Niini. Miadto siya didto sa Arabia sulod sa tulo ka tuig, sa pagtuon sa Daang Tugon, aron tan-awon kung Kinsa ba kadtong Haligi nga Kalayo nga nakigsulti kaniya didto sa dalan, nga nag-ingon, “Saulo, nganong ginalutos mo Ako?” Unsaon niya pagkasayup? Wala man lang gani niya gikonsulta ang iglesia.

Ug katorse ka tuig human niadto, sa diha nga natagbo niya si Pedro, pareho ra nga butang ang ilang ginawali, Pulong sa Pulong. Ingon niana ang atong Biblia. Pasagdi nga mapakyas ang mga pulong sa tawo. *Kini*, walay tawo ang mahimong modugang ngadto Niini. Wala kamo may ginadugang pa sa Biblia. Wala, sir. Kini ang maoy kumpleto nga Kapadayagan. Kini na ang tanan.

⁵⁷ Sama sa Pito ka mga Selyo. “Ang Pito ka mga Selyo,” may usa ka tawo ang sige mosulti kanako, “karon imong . . . Makigsulti ang Ginoo kanimo, Igsoong Branham, sa diha nga mapadayag na kini nga mga Selyo, ug magsulti kanamo kung unsaon ang pagduol pa ngadto sa Dios, ug unsaon ang pagbuhat niini.”

⁵⁸ Ingon ko, “Dili, sir, dili kana mahimo. Tungod kay, ang Biblia, ang Pito ka mga Selyo diha Niini adunay pito ka gililong

nga mga misterio. Nahisulat na kini dinha, apan wala nila kini masabtan kung unsa Kini.”

Himatikdi kung giunsa nila pagpamugos niana, ang pagbautismo diha sa Ngalan ni “Jesus”; kita n’yo, dili ingon niana kini. Sa Ngalan gayud ni “Ginoong Jesus Cristo”! Nakita n’yo na kanang tanan nga mga butang, kung unsa kini. Tungod kay, adunay daghan kaayong mga Jesus; aduna ko’y pipila ka mga higala dinhi sa kalibutan nga ginganlan og “Jesus,” higalang mga ministro. Dili kana ingon niana. Ang ato kining “Ginoong Jesus Cristo.”

Walay tagsulat gawas sa Dios nga mamahimong husto kaayo. Karon tan-awon nato kung giunsa pagsulat kini nga Biblia.

⁵⁹ Karon, pananglitan, gikan sa . . . Unsa kaha kung moadto ta karon ug mokuha og saisentay-sais ka mga basahon pang-medisina nga nagahisgot mahitungod sa lawas, nga gisulat sa kuwarenta ka nagkalainlaing mga eskwelahan sa medisina, usa ka gatus ug dise-sais ka . . . o sulod sa dise-sais ka gatus ka mga tuig? Unsa kaha nga matang sa panag-uyon ang sangkoan nato?

Ingon nga, si George Washington, ang atong presidente, mga duha na ka gatus ka tuig kaniadto, tungod sa pulmonya, gipang-ibot nila ang iyang mga kuko sa tiil ug gipadugo siya og usa ka baso. Unsa kaha kung mokuha kita og . . .

⁶⁰ Maghisgot kita og dugang pa, mahitungod sa pipila ka mga butang nga nadani gayud kita og ayo sa karon, kana mao ang siyensiya. Unsa kaha kung tan-awon nato ang kuwarenta ka nagkalainlaing mga siyensiya, sulod sa dise-sais ka gatus ka mga tuig, ug tan-awon nato kung unsa’y sangkoan nato? Usa ka siyentista nga taga-Pransiya, tulo ka gatus ka tuig kaniadto, nagpamatuod diha sa siyensiya, pinaagi sa pagpaligid og usa ka bola, nga, pagmaabot sa unsa man nga kakusog nga dagan ang sobra sa traynta ka milya kada oras, mangawankawan ang maong butang gikan sa yuta ug molagpot kini. Sa tan-aw n’yo ba nga mobasi pa sa gihapon ang siyensiya diha niana? Aduna pa ba kana og unsa man nga kalabutan sa karon, sa diha nga momaneho na man sila sa dalan, sa mga dalan dinhi, og usa ka gatus ug singkwenta na ka milya kada oras? Kita n’yo? Apan siyentipikong napamatud-an niya kadto, nga tungod sa kakusog sa bola nga nagaligid diha sa yuta, sa nianang traynta ka milya kada oras, nga, ang unsa man nga butang mokawan gikan sa yuta ug molupad, mogawas kini dayon sa kawanangan. Dili, wala na’y katunhayon diha niana.

⁶¹ Apan wala ni usa ka Pulong sa Biblia ang nagakasumpaki sa uban pa nga bahin niini. Wala ni usa ka propeta ang sukad misumpaki sa usa pa. Sila kaniadto, ang matag usa, eksakto gayud. Ug pagmay moabot nga usa ug nagpropesiya, ug kanang tinuod nga propeta mitungha ug gibadlong kadto, kung ingon-

ana madayag kadto. Kita n'yo? Kita n'yo? Busa ang Biblia mao ang Pulong sa Dios, para sa tanang matuod nga mga magtotoo.

⁶² Karon, wala ka'y makuha og unsa man nga kaeksakto sa kung unsa man ang pagauyonan sa mga doktor. Dili ka gani makakuha og kaeksakto gikan kanila sa karon. Dili ka makakuha og kaeksakto sa siyensiya sa karon.

Karon, kabalo mo, usa ka panahon kaniadto, gisulti nila kaniadto nga ang . . . nga, "Sa dihang gisulti sa Biblia nga 'nakita niya ang upat ka mga Manolunda nga nanagtindog diha sa upat ka tumoy sa yuta,' nga dili kana mahimong mahitabo. Lingin man ang kalibutan." Apan nag-ingon ang Biblia, "upat ka tumoy." Bueno, nakita n'yo, duha ka semana ang milabay, o tulo na ka semana ang milabay, hangtud karon, ginamantala sa mga mantalaan kini nga artikulo, nakaplagan nila nga ang kalibutan diay kuwadrado. Pila ang nakakita niana? Aba, sigurado. Kita n'yo? Gikopya ko kadto tanan, gihulat ko lang nga may mosulti og unsa man.

⁶³ Ug makaplagan nila, sa umalabot nga adlaw, nga dili usab og usa ka gatus ug singkwenta ka milyon ka mga tuig sa light-space ang nakita nila. Nagabiyobiyo lang diay sila sa palibot. Eksakto gyud kana.

Mahibaloan ninyo, usa sa niining mga adlaw, nga pagmoadto na kamo sa Langit, wala kamo milupad ngadto sa kung asa man nga dapit. Ania lang kamo mismo, usab, diha sa usa lang ka laing dimension nga mas madali kay sa niini.

Mismo sa niining lawak may nagaagi nga kolor. Ang matag kolor, kamiseta, sinina, unsa man ang gisul-ob ninyo, Eternal, nga naka-rekord, nga padayon nga nagalibot-libot sa kalibutan. Sa matag higayon nga nagapamilok ka, naka-rekord mismo kini. Tan-awa, ang telebisyon ang magpamatuod niana.

⁶⁴ Sa dihang natawo ka, gipaandar na sa Dios ang mao nga rekord. Wala kini naga . . . Gipaandar na ang pag-rekord, wala pa man kini sa una nagasaba, kabalo na mo. Gamay pa man kadto nga masuso, hangtud nga moabot na kini sa pagkahamtong; dinha na nagasugod ang pagsaba niini, nagasugod na siya pagsulti og mga butang ug nagabuhat og mga butang nga iya gayud tulubagon. Ug sa diha nga mahuman na kana nga kinabuhi, ginakuha na kana nga rekord o teyp ug ginabutang na diha sa—diha sa halangdon og daku nga libraryo sa Dios. Karon, unsaon man ninyo paglikay niini pag-didto na sa Hukmanan? Paandaron kini mismo sa inyong atubangan, ang matag lihok nga inyong gilihok, ang matag hunahuna nga misulod sa inyong hunahuna. Makita ba ninyo kana? Karon makita ninyo kon diin ang Dios . . .

⁶⁵ Sa pagtindog ko dinhi, sa miaging gabii, adunay usa ka tawo ibabaw sa entablado, taason, upaw nga tawo, guwapo gayud nga lalaki, mahimsog. Ug miadto siya . . . Daghan kaayong mga

butang ang gisulti sa Dios ngadto kaniya mahitungod sa iyang pamilya ug kung unsa ang kinahanglan niyang pagabuhaton. Ug miadto na siya ug naglingkod. Sulod sa pipila ka minuto, ania makita ko ang usa na usab ka lalaki sa atubangan ko nga sama niana, apan nagduko siya. Dili ko maklaro, ug gitan-aw ko ang mao nga lalaki usab didto; ug siya . . . Dili siya kadto, tungod kay lahi na usab kadto. Ug kini nga lalaki, dili ko siya makita. Mitan-aw ako sa palibot, wala ma'y tawo sa likod, nako. Ingon ko, "Ang mao nga lalaki nagalingkod sulod nianang mga kurtina dinha." Ug kadto mao ang atong . . . usa ka igsoon nga nagasimba dinhi, taason, upaw, guwapohon nga lalaki nga nagalingkod didto nga sama niana. Ug nagdungo ang iyang ulo, nga nagaampo, tungod kay halos mamatay na siya niadto tungod sa sakit sa tiyan.

Mopalit na unta siya niadto og usa ka pares sa sapatos. Gusto sa iyang asawa nga palitan siya og usa ka bag-ong pares sa sapatos. Miingon siya, "Dili na, dili ko na kini kinahanglan, tungod kay dili na ako mabuhi pa aron masul-ob kini."

Mamatay na siya kaniadto. Ug sa paglingkod niya didto, nakita n'yo, sa nianang dimension, alleluyah, basta na lang nagpamuhat ang Dios didto ug miingon, "Dinha siya nagalingkod," sa mismong puwesto nga iyang gikahimutangan kaniadto. Nakita ba ninyo ang buot kong ipasabot?

⁶⁶ Karon himatikdi, ug wala ni unsa man nga sayup diha sa mga Kasulatan. Si Jesus, ang Pulong sa Dios, ginatugkad ang hunahuna nga anaa sulod sa kasingkasing. "Ang Pulong sa Dios mas lig-on, mahait," Mga Hebreohanon 4:12. "Ang Pulong sa Dios mahait, mas gamhanan kay sa usa ka espada nga duhay sulab, nga nagatugkad bisan sa mga hunahuna ug mga katuyoan sa mga hunahuna." Kita n'yo? Nagasulod mismo ngadto sa hunahuna, ug nagapangbutyag, ug nagatugkad. Unsa man ang *motugkad*? "Pag-ila, pagpadayag." Ug ingon niana ang ginabuhat sa Pulong sa Dios.

Sa karon moingon kita, "Ang Pulong sa Dios mao ang Katolikong iglesya; ang mga Baptist, ang mga Methodist, ang Pentecostal, ang tabernakulo," Sayup kana. Ang Pulong maoy kapadayagan; ang Dios, nga gipadayag pinaagi sa Pulong.

⁶⁷ Dili, nakakuha unta kita . . . wala kita'y makuha og unsa man nga katunhayan sa mga doktor, sa mga siyentista, sa nagkalainlaing uban pa.

Kung si Einstein aduna lang unta kaniadto og espirituwal nga aplikasyon, sama nga aduna siya og—og pisikal nga aplikasyon, sa diha nga gitun-an niya ang balaod sa kahayag, ug uban pa, mahimong aduna siya unta og usa ka butang nga masulti kanato. Sa nadunggan ko ang iyang mensahe mahitungod niadtong dakung sentro sa kung asa man didto sa kawanangan, nga, "Pagmakontak mo kana nga sentro, makabuhat ka og mga kalibutan, mabuhat ang bisan unsa man,

ug walay kinutoban ang mao nga gahum.” Kita n’yo? Nakita niya kadto.

⁶⁸ Nakita n’yo kanang gamay nga mga puyo nga nagalupadlupad sa kawanangan, nga ginatawag nilang “mga saucer,” ug uban pa. Ang mga tawo. . . Kana, bueno, mas maayo pa’y pasagdan na lang nato kana. “Nadungog ba ninyo kining mahitungod sa mga tawong nangawala?” moingon kamo. Wala na’y balita kanila; nagtindog lang sila didto, ug wala na sila didto.

Ingon niana ang mahitabo sa Pagsakgaw. Ang usa sa mga niini mahanaw mismo, ug kining yutan-on nga lawas pagailisan na og usa ka lawas nga langitnon. Ug ang mga niini mamahimong. . . ang panit, buhok, o mga bukog pagabiyaan na; pagabag-ohon kini diha sa usa ra ka pagpamilok sa panahon, mahulog mismo diha sa kawanangan ug Ipapauli na kana. Makita nato kini nga nagakahitabo na karon, ug ang—ug nagakatingala ang Pentagon mahitungod sa niining mga kahayag, ug sa mysteryosong mga kahayag, ug sa tanan nga ilang makita diha sa—diha sa kawanangan. Nakita n’yo nga gimantala nila ang usa dinhi sa mantalaan sa Jeffersonville niining semanaha, ug uban pa, “usa ka mysteryosong kahayag.” Busa, oh, wala sila nasayod kung unsa kini. Apan paminaw, suod kong mga anak, pagasakgawon kamo Niini, usa sa niining mga adlaw. Kita n’yo? Kita n’yo? Ayaw kabalaka.

Hinumdumi, nag-ingon si Jesus, “Maingon sa nahitabo kaniadto sa mga adlaw sa Sodoma.”

⁶⁹ Unsa ma’y nahitabo sa wala pa didto sa Sodoma? Mikanaug ang Dios uban sa pipila ka mga Manolunda, ug nagpahigayon Sila og usa ka pagpangusisa para sa paghukom. Miingon, “Nadungog Ko ang tuaw, nga makasasala na kini kaayo, sa hilabihan na gayud, busa mikanaug Ako aron hibaloong kung tanan ba kini kamatuoran o dili.” Husto ba? Bantayi kanang nagapangunang Usa nga mipabilin kang Abraham, nga nahimong matugkad ang mga hunahuna nga atua sa kasingkasing ni Sarah, nga atua sa likod Niya.

Karon, medyo magtan-aw kamo sa palibot ug himatikdi, kita n’yo, bantayi kung unsa ang ginabuhat Niini, mao ra sa gihapon nga butang karon. Usa kini ka pagpangusisa para sa paghukom.

Aba, dili magdugay, ang Iglesia, sa diha nga maanaa na Kini sa niana nga kahimtang, ug mahatud na ang tanang binhi ngadto sa iyang puwesto, mangawala na sila. Dili sila mahibalo kung unsa na ang nahitabo kanila. Ang usa nagapaingon ngadto sa usa ka direksyon. Kita n’yo? Ang usa nagapaingon ngadto sa balay sa pastor, ug ang usa nagapaingon *dinhi*, o paingon *didto*, ug, mahibaloan mo na lang, wala na sila didto. Tungod kay si Enoc nga mao ang tipo, “Gisakgaw siya sa Dios, ug wala na siya nakita.” Mikanaug gayud aron mangusisa! Ang katunhayan,

kung unsa nga ang pagkabalhin ni Enoc, usa ka tipo sa Israel nga gipasakay didto sa arka . . .

⁷⁰ Hingpit gayud, hingpit kaayo ang Pulong sa Dios, bisan ang Daan ug ang Bag-ong Tugon, duha ka tunga sa usa ka tibuok. Husto kana. Ang Daang Tugon katunga Niini, ug ang Bag-ong Tugon katunga usab Niini; ilangkub Kini tanan, makuha mo ang tibuok nga kapadayagan ni Jesus Cristo. Dinha ang mga propeta nga nagapakigsulti kaniadto, ug ania Siya karon sa pagka-Persona; kita n'yo, duha ka katunga ug usa ka tibuok. Karon dili nato gustong dugayon kaayo . . .

⁷¹ Karon, hinumdumi, dili kumpleto ang Daang Tugon nga wala ang Bag-o. Ug dili mahimong kumpleto ang Bag-o nga wala ang Daan. Mao kana ang hinungdan nga gisulti ko og duha ka katunga, usa ka tibuok. Kay, nag-ingon ang mga propeta, “Maania Siya dinhi! Maania Siya dinhi! Maania Siya dinhi; pagabuhaton nila *kini* ngadto Kaniya. Pagabuhaton nila kini ngadto Kaniya!” Ug ania na Siya, “Ania na Siya! Ania na Siya, ug gibuhat na nila *kini* ngadto Kaniya, ug gibuhat nila *kini* ngadto Kaniya.” Bag-o lang ako nagwali mahitungod niana pipila pa lang ka gabii ang milabay.

⁷² Karon, aron nga matun-an gayud ang Kasulatan, giingnan ni Pablo si Timoteo, “Tun-i Kini, mahibalo nga mobahinbahin sa Pulong sa Dios, nga mao ang Kamatuoran.”

Kini ang mga tulo nga gikinahanglan diha sa Kasulatan. Sa paggamit sa Pulong sa Dios, adunay tulo ka mga butang nga inyo kinahanglan dili buhaton. Karon tun-an nato ang mga niini sulod sa napulo ka minuto; tulo ka mga butang nga inyo kinahanglan dili buhaton. Ug ang tanan dinha sa kayutaan, kung asa man kamo, sa tibuok nasud, siguradoha nga mabutang kini diha sa inyong hunahuna kung wala kamo'y lapis. Kinahanglan nga dili ninyo buhaton kining mga butanga. Sa tanang panahon ginasantuhan namo kamo kung unsa nga inyo kinahanglan buhaton, karon pagasantuhan ko kamo kung unsay kinahanglan ang dili ninyo buhaton.

⁷³ Karon, kinahanglan nga dili ninyo *isayup sa pag-interpretar* ang Pulong. Moingon ka, “Bueno, nagatoo ako nga *ingon niini* ang kahulogon Niini.” Ginapakahulogon Niini kung unsa lang ang ginaingon Niini. Wala Kini nagkinahanglan og tighubad. Ug kinahanglan nga dili ninyo *isayup pagpuwesto* ang Pulong. Ug kinahanglan nga dili ninyo *isayup sa paghan-ay* ang Pulong. Ug kung buhaton nato ang hain man sa mga niini, ibutang niini ang tibuok Biblia diha sa usa ka kalibogan ug kagubot.

⁷⁴ Himatikdi. Ang sayup nga pag-interpretar kang Jesus, sa porma nga Dios diha sa usa ka tawo, ginahimo mo Siyang-ginahimo mo Siyang usa ka Dios nga gikan sa tulo. Ang sayup nga pag-interpretar kang Jesus Cristo ingon nga Pulong, ginahimo mo Siyang usa ka Dios nga gikan sa tulo, o ginahimo

mo Siya nga ikaduhang Persona diha sa Pagka-Dios. Ug ang pagbuhat niana, ginalamukat mo ang tibuok Kasulatan. Wala gayud ka'y paingnan. Busa kinahanglan nga dili gayud Kini interpretahon nga sayup.

⁷⁵ Ug kung moingon ka nga ang usa ka butang, nga ginabuhatan mo kini og usa ka interpretasyon, ug ginaaplikar mo Kini ngadto sa laing panahon; o naaplikar na Kini sa laing panahon, nagabuhat ka usab og usa ka sayup nga pag-interpretar.

⁷⁶ Kung aduna man nga mag-interpretar kang Jesus Cristo diha sa Biblia, ingon nga dili ang Mao Mismo nga Dios, ginahimo Siya nga ikaduhang Persona, o usa ka Dios sa tulo, lamokaton niini ang matag Pulong diha sa tibuok Biblia. Pagalapason niini ang nahaunang kasugoan, “Dili ka magbaton og lain nga mga dios sa atubangan Ko.” Sige. Pagabuhaton niini ang tibuok Cristianong kaliwat nga usa ka pundok sa paganong mga magsisimba nga nagasimba sa tulo ka nagkalainlaing mga dios. Nakita n’yo na kung unsa nga matang sa Biblia magkaaduna kamo? Kung ingon-ana pagahimoon kita niini kung unsa ang ginaingon sa mga Judio kanato kung unsa kita. Miingon, “Kinsa diay sa usa niini ang inyong Dios?” Kita n’yo? Busa, nakita n’yo na, dili ninyo mahimong. . . Kinahanglan nga dili ninyo isayup sa pag-interpretar ang Biblia.

Kay, si Jesus Mismo mao ang interpretasyon sa Biblia, sa dihang nadayag Siya sa kapanahonan kon diin nga ang kabahin sa Iyang Lawas ginapadayag. Kung kini usa ka kapanahonan sa kamot, kinahanglan nga kamot gyud kini; dili kini mahimo nga kapanahonan sa ulo. Kung usa kini ka kapanahonan sa tingog, bueno, kung ingon niana, dili kini mamahimong kapanahonan sa tiil. Kita n’yo? Ug karon ania na kita sa kapanahonan sa mata. Ug karon ang sunod, maoy Siya na Mismo, ang moabot. Ang igkikita; pang-propeta!

⁷⁷ Kita n’yo, sa tibuok kapanahonan, misugod kita gikan sa pundasyon, sugod sa unang kapanahonan sa iglesia; sa diha nga ang Binhi nalubong sa yuta, ang tibuok Binhi. Dayon migitib kini diha sa tiil, si Luther; diretso ngadto kang Wesley; dayon ngadto sa mga Pentecostal, sa mga dila, diha sa mga ngabil, kita n’yo; karon anaa na kini sa mga mata, pang-propeta, sa Malaquias 4, ug uban pa. Ug karon wala na’y uban pang nahibilin kondili Siya na Mismo ang moanha, tungod kay kana na ang kaulahiang butang.

Ang sunod mao ang intelihensiya, ug wala kita og intelihensiya nga atoa; iyaha kini. Wala kita’y kaugalingon natong igtatan-aw. Unsaon man pagkahimo sa tawo nga makita daan kanang mga butanga? Dili niya kini mahimo. Ang Dios kini Mismo. Kita n’yo, kini—miabot na kini sa punto niini. Ug Iyang gipamunoan ang lawas sukad-sukad hangtud karon,

dayon nadayag ang mao nga kumpletong Lawas ni Cristo diha sa porma sa usa ka Pangasaw-onon nga kinuha gikan sa Iyang kiliran, sama sa gibuhad ni Adan sa sinugdanan. . . sama kang Adan kaniadto, diay, sa sinugdanan.

⁷⁸ Oo, “dios,” ibutang niini ang tibuok Biblia diha sa usa ka kalibogan, pagalapason ang nahaunang kasugoan, ug mohimo og usa ka diosdios, usa ka paganhong dios nga tulo ka buok. Kini gayu’y—lamukaton gayud niini ang tibuok larawan sa Biblia. Busa ayaw gayud ninyo isayup sa pag-interpretar ang Biblia. Karon, usa ra kana ka butang.

⁷⁹ Sa dihang, ang matag Kasulatan diha sa Biblia adunay pareho ra nga mga aplikasyon, kinahanglan ninyong iplatar. Kini sa puwesto Niini. Ug ang sayup nga pagpuwesto Niini, mahimo ninyo Siya nga Dios sa usa ka kapanahonan, ug—ug sa sunod nga kapanahonan mahimo ninyo Siya nga usa na lang ka kasaysayan, tungod sa sayup nga pagpuwesto Niini. Busa kinahanglan dili ninyo isayup sa pagpuwesto ang Kasulatan. Siya’y Dios sa tanang kapanahonan. Kung gihimo ninyo Siya sa karon og usa na lang ka Dios sa kasaysayan, kung unsa Siya kaniadto, ug nga dili Siya mao sa gihapon karon, unsa ma’y inyong buhaton sa Mga Hebreohanon 13:8? Kita n’yo, “Siya mao sa gihapon kagahapon, karon, ug hangtud sa kahangturan.”

⁸⁰ Karon, busa nakita n’yo kung unsa ang mahimong buhaton niini, ug kung unsa na ang nabuhat niini. Gibuhad na niini kini, ang ipalimod Kaniya ang Kaugalingon Niyang Pulong, tungod sa sayup nga pagpuwesto sa mga Kasulatan.

⁸¹ Ang sayup nga paghan-ay sa mga Kasulatan, mahimo ninyong maiplastar ang Iyang lawas nga sayup, mapahimutang ang tiil kon diin didto unta ang ulo, o ingon niana. Sama lang sa usa ka . . . Sa laing pagkasulti, mahimo ninyong mapatudlo si Jesus og mensahe ni Moises. Mahimo nga inyong. . . o bisan si Wesley nga mapatudlo ninyo og niadtong para sa kapanahonan ni Luther. Mahimo ninyo sa karon, sa atong panahon, nga maipatudlo ang Pentecost, ang mensaheng Pentecostal. Nakita n’yo na kung unsa nga kalamukat ang madangatan Niini? Nahipakita na sa Pentecostal ang tinuod nga kolor niini. Nahipakita na ni Luther ang iyahang kolor, nga miadto sa pagka-denominasyon. Namatay kini mismo didto. Miabot ang mao nga kapanahonan; namatay kini.

⁸² Himatikdi, sa dihadiha nga nag-organisa kini, namatay kini. Karon, tan-awa lang ninyo kung dili ba kana husto. Baliki ninyo ang mga panid sa kasaysayan. Sa matag higayon nga nag-organisa kini, namatay kini mismo dinha; wala na gyud may nahibilin pa niini. Nahimo kining usa—usa ka magsisimba sa diosdios niining kalibutan, ug napaingon ngadto sa mga organismo, ug mga organisasyon, ug mga denominasyon, ug mga ilusyon. Usa ka pundok sa mga Ricky ang ningsulod

dinha ug naghimo sa kaugalingon nilang mga pagsupak niini, o nagpasulod sa kaugalingon nilang mga ideya, diay ngadto niini. Ug unsa ang nahitabo niini? Nahimo kining usa ka kalamukat. Magadangat kini ngadto sa diosdios niining kalibutan, kon diin pagapurongpurongan nila si Satanas mismo, sa pagdahum nga aduna na sila og usa ka halangdon nga pang-kalibutan nga lider nga maghatud kanila og pakigdait.

⁸³ Gisultihan ko na kamo sa miaging adlaw, isulti ko kini pag-usab, nga bisan ang sibilisasyon mismo sa karon klaro kaayo nga supak gayud sa Dios. Supak sa Dios ang sibilisasyon. Usa ka milyon ka milya na ka halayo Kaniya ang edukasyon; usa usab ka milyon ka milya ang siyensiya. Ginapaninguhaang pamatugdan sa siyensiya ug edukasyon nga walay Dios, kita n'yo, pinaagi sa teolohikanhong mga seminaryo ug eskwelahan, ug mga lawak pang-siyensiya, ug uban pa. Aduna sila og ilang mga pagtay-og.

Unsa na man ang mahitungod sa panan-awon ko sa miaging gabii, mahitungod niadtong lalaki sa dihang gisinggitan niya kadtong mga siyentista didto nga ginabubo kadto nga butang nga sama niana? Milingi lang sila ug mitan-aw, ug mipadayon lang. Magkaaduna og usa pa ka pagbiyahe.

⁸⁴ Himatikdi, oh, kinahanglanon gayud kining tulo ka mga kinahanglan. Karon, dili ninyo mahimong. . . Wala mianhi si Jesus nga nagawali sa mensahe ni Noe. Wala Siya mianhi nga nagawali sa mensahe ni Moises. O, si Moises wala mianhi nga nagawali og. . . Kita n'yo, ayaw gayud isayup sa pagplastar ang Kasulatan. Kinahanglan Kini nga naka-panahon gayud. Karon, dili ninyo mahimong iaplikar. . . Sa diha nga ang kadtong halangdon nga tawo, nga si John Wesley, mitungha, o. . .

Ang halangdon nga lalaking, si Luther, sa diha nga mitungha si Luther nga dala ang iyang mensahe nga pagpamatarung. Karon sa diha nga kadto'y usa ka. . . Halangdon nga tawo si Luther. Gitawag niya pagawas ang iglesia gikan sa kangitngit, ug iyang giplastar ang pagpamatarung pinaagi sa pagtoo. Ug sa diha nga nabuhat niya kini, ningtukod sila og usa ka organisasyon sa ibabaw niini, ug namatay kini. Mibiyaha ang Kinabuhi, sama nga atua kini sa lindog sa trigo, mipaingon ngadto sa kapanahonan ni Wesley, ngadto sa uhay. Gikan kang Luther ninggawas ang uban pa nga mga dahon, nga nangamatay kauban niini, nga maoy sila Zwingli, ug Calvin, ug ang tanang uban pa nga ningtungha gikan niadtong dakung repormasyon.

⁸⁵ Dayon miabot si Wesley, usa na usab ka kapanahonan ang nanglimbukad ngadto sa usa ka uhay. Si Wesley, ug si Atterbury, ug ang tanan sila, ug—ug si John ug ang igsoon niyang lalaki, ug tanan sila, halangdong mga tawo sa Dios nga dala ang usa ka mensahe, ang mikuyanap sa nasud. Pagkaorganisa nila niini; namatay kini.

Dayon mitungha kini nga ang hitsura eksaktong sama gayud nga daw sa igapamunga niya na karon ang trigo, ug, nahibaloan na lang, nga usa kadto ka tipaka, Pentecost.

Apan sa likod niining tanan, migawas ang usa ka gamay'ng udlot.

Ug mahimatikdan ninyo, kasagaran . . . siguro, sulod sa mga tulo o upat ka tuig human nga wala na sa natad si Luther, giorganisa ang Lutheran nga iglesia. Sa hamubo lang nga panahon human nga wala na sa natad si Wesley, giorganisa kini.

⁸⁶ Sa Tucson, aduna kami og usa—usa ka programa kung unsa nga ang iglesiang Wesley, o ang iglesiang Methodist, mitungha. Ug sa dihang miabot sila dinhi sa Amerika, daghan kanila ang ningbalik ug nag-ingon nga nagbuhat sila og usa—usa ka lagda sa katukuran ug uban pa, nga gikan pa sa England, aron nga dalhon dinhi, ug kung unsa nga gi-drama pa nila kadto. Nakita ko mismo kaniadto kung unsay nahitabo. Didto kini namatay.

⁸⁷ Bueno, ningtungha ang mga Pentecostal, silang mga sa usa pang mga nagasinggit sa dugay nang mga panahon, nagkaaduna og gasa sa pagsulti og laing mga dila, ug misugod dinha sa pagsulti og laing mga dila. Dayon gitawag nila kining, “ang ebidensiya sa Espiritu Santo.” Dayon nag-organisa sila. Ang usa miingon nga buhaton niya ang *ingon-niini*, ug usa na pud ang *ingon-niana*, ug nagkaaduna sila mga isyu-isyu. Unsa ang gihimo niini? Ningbukhad ang matag usa kanila nga mga dahon, sama lang sa nahitabo didto sa lindog ug sama sa nahitabo didto sa uhay. Nagkaaduna sila og oneness, twoness, threeness, ug ang church of God, ug tanan nang uban pa niini; basta na lang nga ningbukhad, ningbukhad, ningbukhad.

Apan karon, sumala sa kinaiyahan, nga maoy usa ka hingpit nga ehemplo, wala gyud kamo may mahimo og unsa man aron tudloan kini pagawas sa kinaiyahan niini.

⁸⁸ Usa ka pamilya, sa mga higala ko didto sa Kentucky, bag-o lang nagkaaduna og usa ka gamay—gamay nga bata nga natawo sa miaging adlaw lang, ug didto ang inahan sa dihang nagluto sila og panihapon. Ug ginatabangan niya ang usa pa ka igsoong babaye sa pagluto og panihapon para sa usa ka pundok namong mga kalalaken-an nga gikan pa sa pagpangayam. Ug busa naghilak ang maong masuso, ug nagasulti ako niadto. Siguro medyo naulaw ang maong inahan, mao nga midagan siya ug gikuha ang bata, ug—ug gisugdan sa—sa pagpasuso ang gamay'ng bata. Ingon ko, “Kabalo ka, kinaiyahan lang kana.” Kita n'yo? Karon, dili ninyo mahimong . . .

Wala gayud sila may nakita og unsa man nga mas maayong paagi para sa usa ka bata nga maangkon kung unsa ang gusto niini kay sa ang maghilak para niini. Karon, mahimong hatagan ninyo kini og usa—usa ka libro sa pamatasan, ug maglingkod dinhi ug moingon, “Gusto ko ikaw tudloan og teolohiya, anak.

Karon, dili ka magtiyabaw dinhi sama sa ubang mga bata; lahi ka. Karon, paggusto na nimong mokaon, imong bagtingon kining gamay nga bagtinganan dinhi.” Dili kini magpulos. Dili, dili gayud kini magpulos.

⁸⁹ Busa, pagtan-awon mo ang kinaiyahan, karon makita nato kon diin ang matag kapanahonan, ug direkta nga gidisenyo kini nga ania na kita sa kaulahi pang kapanahonan. Mikalas na ang tipaka. Ug nagkaaduna na kita og kinse ka tuig, halos baynte na ka tuig karon, mga katuigan na, nga nagakaylap ang Mensahe sa tibuok nasud hangtud sa ubang nasud, ug sa niining buntaga nakakonekta pa karon sa tibuok niining nasud, kita n’yo, ug walay organisasyon. Dili kini mahimong mag-organisa. Wala pa sukad nagkaaduna og bisan unsa man nga sama niini, o magkaaduna man sa umalabot. Kita n’yo?

Ang—ang butang nga importante sa Mensahe karon, mao nga, ang kadtong mga nakabaton Niini diha sa ilang mga kasingkasing kinahanglan nga magbulad diha sa Presensiya sa Anak, aron nga mahinog. Kita n’yo? Mahimo kamong magpatalinghug sa Mensahe, ug dayon tugotan nga lutoon sa Anak ang tanang kahilaw pagawas gikan kaninyo, kita n’yo, nagahimo og mga hamtong nga Cristohanon. Nakita n’yo kung unsay akong pasabot? Haduol na ang pag-abot sa Dios, aron nga dawaton ang Iyang Iglesia, ug kinahanglan nga aduna kita og ingon niana nga matang sa mga Cristohanon aron Iyang dawaton. Ang—ang trigo kinahanglan nga mahinog. Sige.

⁹⁰ Kining tulo kinahanglan nga tumanon. Kinahanglan nga dili isayup sa pag-interpretar, o isayup ang pagdala Niini, isayup Kini sa pag-interpretar, o isa- . . . o isayup Kini sa paghan-ay. Kinahanglan nga tumanon Kini sa paagi nga eksakto gayud sa pagkasulti sa Dios niini.

Para sa kalibutan, usa Kini ka libro sa mga misteryo. Nagatoo ang mga tawo nga usa lang Kini ka misteryosong Basahon. Usa ka higayon nagapakig-estorya ako sa usa ka bantugan kaayong tawo dinhi sa siyudad, nga nag-angkon og dakung ranggo sa Cristianismo, ug nag-ingon siya, “Gisulayan ko sa pagbasa ang Basahon sa Pinadayag usa ka gabii.” Miingon, “Si Juan nakakaon siguro kaniadto og usa ka mahalang nga sili ug nga giurum siya.” Kita n’yo, usa ka Libro sa mga misteryo.

⁹¹ Apan, para sa tinuod nga magtotoo, ang Kapadayagan Kini sa Dios nga nahipadayag sa kapanahonan nga atong gikapuy-an. Miingon Siya, “Ang Akong mga Pulong Espiritu ug Kinabuhi.” Gisulti kana ni Jesus. Usab, “Ang Pulong usa ka Binhi nga gipugas sa usa ka magpupugas.” Nasayod kita nga matuod kana. Ang Dios kini sa pormang Pulong, ug mahimo lamang interpretahan pinaagi Niya Mismo.

Dili arang interpretahan sa tawhanong hunahuna ang hunahuna sa Dios. Unsaon man sa luoy’ng—luoy’ng hunahunang

may kinutoban pag-interpretar sa Hunahunang walay kinutoban, sa diha nga dili gani nato mahimo ang pag-interpretar sa usa'g usa natong hunahuna?

⁹² Ug himatikdan ninyo, Siya ang maoy Usa lamang nga makahimo sa pag-interpretar Niini, ug Iya Kining gina-interpretar ngadto sa mga gusto Niya. Wala Kini nagasulti, “Mga tawo kaniadto, samtang nga nagbaktas sila sa tibuok yuta diha sa nagkalainlaing panahon ug sa nagkalainlaing mga paagi.” “Ang Dios, sa nagkalainglaing panahon ug sa nagkalainlaing paagi nagpadayag sa Iyang Kaugalingon ngadto sa Iyang mga propeta.” Kita n’yo?

⁹³ Ug, himatikdi, “Ngadto sa mga gikahimut-an Niyang padaygan Niini.” Ug Iya gayud gidisenyo aron nga mahimo Niyang itago ang Iyang Kaugalingon diha sa Kasulatan, ngadto sa pinakamaalam nga teologo. Oh, sus! Iya gayud mahimong ililong ang Iyang Kaugalingon, anaa lang dinha sa Kasulatan, ug tibuok adlaw ninyong pangitaon ug dili gayud kini makita; pangitaon man sa tibuok kinabuhi, ug dili gayud kini makita. Mahimo Niya gayud itago ang Iyang Kaugalingon, nga anaa lang dinha.

⁹⁴ Karon, kon mahimo, sa tanang dapit, tugoti nga motuhop kana. Nga, ang Dios, diha sa Pulong, mahimo nga itago gayud ang Iyang Kaugalingon diha sa Pulong, nga wala ni usa man ka teologo o eskwelahan sa kalibutan ang makakaplag Kaniya, ug bisan pa niana anaa lang Siya mismo dinha.

Moingon kamo, “Husto ba kana, Igsoong Branham?”

Unsa man ang mga Fariseo ug mga Saduceo kaniadto? Unsa na man ang bahin sa matag kapanahonan? Gibuhat na Niya kini. Oo. Gibuhat na Niya ang ingon niana sa matag kapanahonan. Karon mahimo natong susihon kana. Hunahunaon nato ang mahitungod sa mga adlaw kaniadto ni Noe; maantigo, intelektuwal nga kapanahonan, kung giunsa Niya kaniadto pagtago sa Iyang Kaugalingon diha sa Iyang gisaad nga Pulong. Sa mga adlaw ni Moises, kung giunsa Niya kaniadto pagtago sa Iyang Kaugalingon. Sa mga adlaw ni Elias, kung giunsa Niya pagtago kaniadto sa Iyang kaugalingon. Sa mga adlaw ni Jesus, kung giunsa Niya kaniadto pagtago sa Iyang Kaugalingon. “Siya’y anaa sa kalibutan, ug ang kalibutan gibuhath pinaagi Kaniya, ug ang kalibutan wala nakaila Kaniya. Sa mga Iya mianhi Siya; ang mga Iya wala modawat Kaniya.” Kita n’yo?

⁹⁵ Ginatago Niya ang Iyang Kaugalingon gikan sa mga pinakamaalam, intelektuwal nga mga tawo nga aduna sa kalibutan. Moingon kamo, “Bueno, kini si Dr. Balaang Amahan nga *Ingon niini ug ingon niana.*” Dili ko igsapayan kung kinsa man siya, ginatago sa Dios ang Iyang Kaugalingon gikan kaniya;

ug igapadayag kini ngadto sa mga bata nga makatuon, kita n'yo, mga bata nga iya sa Dios, predestinadong binhi.

⁹⁶ Hunahunaa. Ang Gamhanang Dios, nga nagtago sa Kaugalingon Niyang mga Pulong, ginabuta ang mga maalam, edukadong mga tawo sa niini karon nga kapanahonan, ug dili nila makita kini. Ang dahum nila nga usa lang kini ka pundok sa panatisismo. Tan-awa Siya nga anaa lang dinha nga nagatago, ngadto sa mga Pentecostal, mga Baptist, mga Methodist, Presbyterian. Ginapadayag ang Iyang Kaugalingon mismo sa kadaghanan, ug ginapakita ang tanan na nga matang sa mga butang, ginamantala pa gani kini sa mga mantalaan, ug mga butang nga sama niana, apan bisan pa niana dili nila kini makita. Oh, ang atong Dios, pagkahalagdon, ginapadayag ang Iyang Kaugalingon ngadto sa kang kinsa man nga gikahamutan Niyang padaygan.

⁹⁷ “Oh,” moingon kamo, “Si Igsoong Jones o si Igsoong *Ingon-ani ug ingon-ana*, siya’y—usa siya ka halangdong tawo. Makita niya Kini.” Oh, dili. Ginapadayag Niya Kini ngadto sa mga buot Niya. Moingon, “Dili Kini makita sa akong asawa, ug usa man siya ka Cristohanong babaye.” Ginapadayag Niya ang Iyang Kaugalingon ngadto sa mga buot Niya. “Bueno, ang akong pastor usa ka halangdong tawo.” Husto kana, apan ginapadayag Niya ang Iyang Kaugalingon ngadto sa mga buot Niya. Karon, susiha kung unsa na ang mga nahipadayag, ngadto sa kung unsa ang nagakahitabo, dayon inyong . . . masabtan gayud ninyo.

⁹⁸ Karon mahimatikdan nato kung ingon-ana, ginahimo niini Kini nga Libro sa Dios ug dili nga libro sa tawo. Kung Kini iya pa sa tawo . . . Karon tan-awon nato kung ginaunsa Niini pagpahayag sa Kaugalingon Niini. Tan-awa kung ginaunsa Niini pagbutyag sa kasal-anan sa mga tawong misulat Niini, himatikdi, ang mga tawo nga—nga nagkinabuhi sa mga adlaw Niini.

Si Abraham, pananglitan, gitawag siya “ang amahan sa mga matinoohon.” Himatikdi kung unsa nga . . . Sa tan-aw n'yo ba nga isulat ni Abraham kini nga Libro mahitungod sa iyang kaugalingon, mahitungod sa kaugalingon niyang katalawan? Unsaon n'yo paghunahuna kung giunsa niya kaha sa pagsulat nga namakak siya sa hari niadto nga buntag, ug nag-ingon nga igsoon niya kadto, nga iya man kadto nga asawa? Mosulat kaha kini mahitungod sa talawan nga mga buhat nga iyang gibuhat? Sigurado, dili niya kana buhaton.

⁹⁹ Unsa na man ang mahitungod kang Jacob diha sa iyang mga panikas? Medyo usa ka maglilimbong si Jacob kaniadto. Mahimo ba nga ang usa—usa—usa ka tawo, usa ka Hebreohanon nga nagasulat mahitungod sa Hebreohanon niyang igsoon, nga diha kaniya gitawag ang tanang Israel, magapangahas kaha siya nga isulat ang mga pagpanikas sa mismong amahan sa maong

tibuok nasud? Kang Jacob, migawas ang mga patriyarka; gikan sa maong mga patriyarka, migawas ang mga banay niini. Ug mao ang batong pundasyon sa tanan-tanan niini, ginabutyag siya sa Biblia ingon nga usa ka maglilimbong. Husto ba kana? Sa tan-aw n'yo ba isulat kana sa tawo? Dili, sir.

¹⁰⁰ Unsa na man ang bahin sa usa ka tawong nagasulat mahitungod sa pinakabantugan nga hari nga sukad nagkaaduna sila dinhi sa yuta, ingon nga piniling hari; si David, diha sa iyang pagpanapaw? Isulat kaha sa mga Judio ang mahitungod sa ilang pinaka-halangdong hari ingon nga usa ka mapanapawon?

Oh, aduna kita sa kasaysayan, sama, “ni George Washington nga wala gayud nakapamakak,” ug mga butang nga sama niana. Maingon nato, matawag nato kana nga kasaysayan.

Apan usa kini ka tawo, usa ka Biblia nga ginatawag si David nga usa ka “mapanapawon,” ug mao gayud siya. Ang hari sa Israel, usa ka mapanapawon nga maoy mamahimong anak sa . . . si Jesus nga mamahimong Anak ni David. Ang mismong Pangulong-bato; ug ang Iyang amahan, sumala sa unod, usa ka mapanapawon. Ang mga Judio dili gayud mosulat og usa ka Libro nga sama niana. Mosulat ba ang tawo og ingon niini mahitungod sa iyang kaugalingon? Siguradong dili gayud.

¹⁰¹ Unsaon man pagkahimo sa nianang mapasigarbohon nga nasud sa Israel? Kabalo na mo kung unsa sila ka mapasigarbohon. Mapasigarbohon nga nasud sa Israel, nagpadayon ug nagsulat mahitungod sa mismo nilang mga pagsimba sa diosdios, nagsulat mahitungod sa ilang mga pagsupil batok sa Dios, nagsulat batok sa mga mahugaw, mahilas nga mga butang nga ilang gipanghimo, ug gisulat diha sa usa ka libro? Siguradong itago gyud nila kana. Ipakita lang nila ang mga maayong butang. Apan, kining Biblia, nga nagatug-an kung unsay husto ug kung unsa ang sayup. Kini, nasayod ang si kinsa man nga ang mga Judio dili gayud mosulat og usa ka Libro nga sama niana, mahitungod sa kaugalingon nilang mga kahugawan, ug mga pagsimba sa diosdios, ug kapakyasan, ug tanan na nga aduna sila kaniadto. Dili gayud sila mosulat og ingon niana. Oh, dili.

Kung ingon-ana, Kinsa man ang nagsulat Niini? Ang Biblia nag-ingon, diha sa Mga Hebreohanon 1:1, “Ang Dios, sa makadaghang higayon ug sa nagkalainlaing mga paagi misulti ngadto sa mga ginikanan pinaagi sa mga propeta,” Kung ingon-ana, dili ang mga propeta kaniadto, dili ang tawo kaniadto. “Ang Dios!” Dili nga “mga propeta sa makadaghang higayon.” Kondili, “Ang Dios, sa makadaghang higayon, sa nagkalainlaing paagi nagsulti ngadto sa mga ginikanan pinaagi sa mga propeta.”

Aduna ko og usa ka Kasulatan nga nasulat dinhi. Wala ko kabalo kung unsa Kini; dili ko mapahinungdan Kini.

Kasagaran, sa diha nga mopahinungod ako sa niining mga butang, ginapangita ko sa Kasulatan. Pangitaon ko kini sa makadiyut lang, kung itugot ninyo kanako. Kini sa Ikaduhang Timoteo 3:16. Ako—ako—abi ko mahinumduman ko kana, pero pasayloa ninyo ako. Mohunong ako sa makadiyut aron hibaloon kung unsa kini.

¹⁰² “Ang Dios, sa makadaghang higayon ug sa nagkalainlaing mga paagi misulti ngadto sa mga ginikanan pinaagi sa mga propeta.”

Karon sa Ikaduhang Timoteo 3, 3:16. Tan-awon nato kung unsa ang ginaingon diha sa 3:16.

Ang tibuok nga Kasulatan (oo) gituga sa (Mga propeta ba? Dili) . . . gituga sa (Unsa?) sa Dios, ug may kapuslanan alang sa pagpanudlo, ug sa pagpamadlong, ug sa pagpanul-id, ug sa pagmatuto sa pagkamatarung:

Aron ang tawo sa Dios mamahingpit, masinangkapan alang sa tanang maayong buhat.

¹⁰³ Sige, kung ingon-ana, ang tibuok Kasulatan gisulat pinaagi sa pagdihog. Si Jesus, dinhi pa sa yuta, nag-ingon nga ang mga langit ug yuta mangahanaw, apan ang Iyang Pulong dili. Nag-ingon Siya ang tibuok Kasulatan mamatuman gayud. Busa kung ingon-ana ang mao nga Libro dili usa ka libro nga sinulat sa tawo. Libro Kini nga sinulat sa Dios.

¹⁰⁴ Karon, nahibalo kita nga gipili sa Dios pinaagi sa predestinasyon ang Iyang Iglesia, ang Iyang lugar, ang Iyang mga propeta, ug ang tanan bahin niini. Pinaagi sa paghibalo nang daan, Iyang gipili nang daan ang Iyang propeta. Ug sa diha nga miabot ang mao nga kapanahonan, gipatungha Niya usab ang Iyang propeta sa mao rang panahon, ug gidihogan siya sa diha nga gisulat Niya ang Biblia pinaagi kaniya. Karon, gisulat sa Dios ang Biblia pinaagi lamang sa paggamit og propeta, tungod kay ingon niana ang Iyang paagi sa pagbuhat niini. Busa, kita n’yo, dili kini pulong sa . . . Busa, kita n’yo, Kini mao ang Pulong sa Dios, ug dili pulong sa tawo.

¹⁰⁵ Ang Dios usa ka Persona. Makapakig-estorya ang Dios. Makasulti ang Dios. Makasulat ang Dios. Dili Niya gikinahanglan nga buhaton kini sa ingon nianang paagi, apan Iyang—Iyang gipili nga sa ingon niana nga paagi Niya nga buhaton kini. Dili Niya gikinahanglan nga buhaton kini sa ingon nianang paagi, apan gipili Niya nga buhaton kini sa ingon nianang paagi. Karon moingon kamo, “Gisulat man sa Dios pinaagi sa Iyang tudlo, pinaagi sa Kaugalingon Niyang halangdong tudlo, ang napulo ka mga kasugoan. Busa makasulat ang Dios, Siya Mismo, kung gustohon Niya.” Kita n’yo? Apan Iyang—Iyang gipili nga isulat Kini pinaagi sa mga propeta, kita n’yo. Tungod kay Iya kining mga kinaiyahan, ang Iyang Pulong, nagpahayag Siya pinaagi sa mga niini, nga ginahimo ang tanan

nga kabahin, o usa ka kabahin Niya. Kita n'yo? Makasulat Siya pinaagi sa Iyang tudlo. Iya usab gigamit ang Iyang tudlo ug nagsulat didto sa mga bongbong sa Babylon, "Ikaw gitimbang diha sa timbangan ug nakita nga kulangan." Nagsulat Siya pinaagi sa Kaugalingon Niyang tudlo.

¹⁰⁶ Makasulti ang Dios. Nagatoo ba kamo nga ang Dios makasulti? Nakigsulti Siya kaniadto kang Moises didto sa bukid, diha sa usa ka nagadilaab nga sapinit. Nagatoo ba kamo niana? Oo, sir. Nakigsulti Siya kang Juan, diha sa porma sa usa ka salampati, (nagatoo ba kamo niana?) nga, "Kini ang pinalangga Kong Anak nga Kaniya may kalipay Akong magpuyo." Nakigsulti Siya ngadto kaniya. Nakigsulti Siya kang Jesus didto sa Bukid sa Pagkabalhin, sa atubangan ni Pedro, ni Santiago, ug ni Juan. Makasulti Siya. Dili Siya amang. Makasulti ang Dios. Busa nakigsulti Siya kaniadto kang—kang Jesus didto sa Bukid sa Pagkabalhin. Ug nakigsulti Siya kang Jesus didto sa atubangan sa tibuk kadaghanan sa mga tawo; sa dihang, nanag-ingon ang mga tawo nga midalogdog, apan ang Dios kadto nga nakigsulti kang Jesus. Ug halos tibuk sa Mateo, Marcos, Lucas, ug Juan, maoy si Jesus nga nagasulti. Siya'y Dios. Busa, makasulti ang Dios.

¹⁰⁷ Gigamit ang Kaugalingon Niyang mga tudlo ug nagsulat diha sa balas, usa ka adlaw. Nagsulti Siya, nagwali Siya, nagpropesiya Siya, gamit ang Kaugalingon Niyang mga ngabil, gihimo sa Dios, sa diha nga nahimo Siyang unod nga nagpuyo ipon kanato, "Ang Dios nga nadayag diha sa unod." Kung makasulat Siya, makasulti, dili ba Niya usab masulti sa uban kung unsay buhaton? Mahimong sigurado. Makasulti Siya ngadto kanila, diha sa usa ka tingog sa tawo. Makasulat Siya ug ipakita kanila kung unsay buhaton. Nahimo na Niya kini.

Busa, "Ang Dios, sa makadaghang higayon ug sa nagkalainlaing mga paagi misulti ngadto sa mga ginikanan pinaagi sa mga propeta." Ug miingon Siya, sa ibabaw niining Kasulatan, nga, "Walay pagasayloan bisan usa ka kudlit o tulpok hangtud nga matuman Kini," ug dayon mahipadayag Kini; kung ingon-ana nagakatuman Kini, tungod kay nadayag Kini. Dili pa Kini matuman kaniadto, apan sa diha nga ang Pulong Mismo nahimo nang unod. Nagakahulogan ang *kudlit* og "gamay nga pulong." Ang *tulpok* nagakahulogan og "gamay nga marka." Wala ni usa ka panulbok, ni usa ka linitokan, bisan unsa man, ang mapakyas man lang diha sa Pulong sa Dios. Dili Kini mahimong mapakyas, tungod kay Dios Kini, ang Dios nga nadayag diha sa porma sa usa ka tawhanong unod. Kay, ang Dios kini Mismo diha sa pormang letra, sa pormang propeta, nga nadayag diha sa unod.

Karon, mao kana ang hinungdan nga makasulti si Jesus, "Kadtong mga nanagsulti kaninyo, gitawag ninyo sila og 'mga dios,' nga mga nagsulti kaninyo sa Pulong sa Dios," ang

ingon, “ug sila’y mga dios.” Kadtong mga propeta sa diha nga dinihogan sila sa Espiritu sa Dios, ug nga naghatud eksakto sa Pulong sa Dios, kung ingon-ana sila’y mga dios. Ang Pulong kadto sa Dios nga nagasulti pinaagi kanila. Ug mahimong . . .

¹⁰⁸ Ug naga-interpretar lamang sila sa diha nga tugotan sila sa Tagsulat nga mag-interpretar. Karon kon gusto ninyong pangitaon kana, kana’y anaa sa Ikaduhang Pedro 1:20 ug 21. Sige. Tungod, kini, kon diin ang Dios. . . “Walay unsa man nga kinaugalingon nga pag-interpretar.” Siya ang nagabuhat sa Kaugalingon Niyang pag-interpretar.

Ang Dios ang nagasulti ug naga-interpretar Niini, Siya Mismo, dayon ginapadayag Kini ngadto sa mga gusto Niyang padaygan, ginalilong sa mga uban pa. Dili Niya Kini kinahanglan ipadayag sa kang kinsa man gawas kung gusto Niya. Ug wala Niya. . . Siya, gipahayag na Niya ang tibuok Niyang butang diha sa Kasulatan, busa ang maong tibuok butang naipahayag na; nagapahiluna na lang Siya dinha nga ginabantayan kini nga nagakahitabo. Kita n’yo? Dili. Ginabantayan gayud ang Lawas nga mahimo na ug mobalik na ngadto Niini, ngadto sa porma, nga Iyang Pangasaw-on pag-usab. Sige.

¹⁰⁹ Ang mga magtotoo nagatoo Niini, sama ni Abraham nga gitawag ang mga butang nga sukwahi Niini nga mora og dili ingon niana.

¹¹⁰ Kini usab, kining Pulonga, nagatugkad sa mga tinago sa mga kasingkasing, Mga Hebreohanon 4:12. “Nagatugkad Kini sa mga tinago sa kasingkasing.”

¹¹¹ Ang mga propeta kanunay wala nakasabot kaniadto sa kung unsa ang ilang ginasulat o kung unsa ang ilang ginasulti, o wala unta nila kini gisulti, kung nasabtan nila Kadto. Kita n’yo? Apan nag-ingon ang Biblia, “Gipalihok sila sa Espiritu Santo.” Gipalihok! Pag-ginapalihok ka sa Espiritu Santo, nagalihok gyud ka. Ang tawo. . . “Ang Dios, sa makadaghang higayon ug sa nagkalainlaing mga paagi misulti ngadto sa mga propeta nga mga gipalihok sa Espiritu Santo.” Mao kana kon nganong, sa tanang kapanahonan, ang espirituhanong mga tawo nagakonsulta sa mga propeta mahitungod sa mga panahon ug sa kung unsa ang mahitabo.

Ang propetang-manunulat anaa gayud sa walay-hunong nga pagpakig-fellowship sa Tagsulat. Kita n’yo? Kanunay gayud siya nga nagakinabuhi diha sa Presensiya sa Tagsulat, aron mahibaloan kung unsay kadangatan sa maong Basahona. Kita n’yo? Ang maong propetang-manunulat, kanunay nga andam ang iyang pang-sulat sa unsa mang higayon, walay-hunong nga pagpakig-fellowship sa Tagsulat, nga mao ang Dios, aron isulat kung unsa man ang giingon Niya nga isulat. Kita n’yo? Nagpakita lang kung unsa nga matang sa pagkinabuhi ang

kinahanglan niyang . . . usa ka kinabuhing gilain gikan sa tanan niyang mga kabanay.

112 Karon, mao kana kon ngano nga ang propeta kanunay nga nakahuna ang iyang hunahuna sa kung unsa ang giingon sa Dios; dili sa kung unsa ang gihunahuna sa tawo, sa kung unsa ang ginahunahuna sa kapanahonan, sa kung unsa ang ginahunahuna sa simbahan, sa kung unsa ang ginahunahuna sa gingharian. Kung unsa gayud ang ginahunahuna sa Dios! Iya lamang ginapahayag ngadto sa pagka-Pulong ang mga hunahuna sa Dios, tungod kay ang pulong usa ka hunahuna nga gipahayag. Nakuha ba ninyo kini karon? Ang Pulong maoy usa ka hunahuna nga gipahayag, busa nagahulat ang propeta alang sa mga hunahuna sa Dios. Ug sa diha nga gipahayag na sa Dios ang Iyang mga hunahuna ngadto kaniya, iya kining ipahayag diha sa pagka-Pulong, “MAO KINI ANG GINAINGON SA GINOO.” Kita n’yo, dili nga “Mao kini ang ginaingon ko, nga propeta.” “MAO KINI ANG GINAINGON SA GINOO!” Kita n’yo? Sige.

113 Mao kana kon nganong gisupak nila ang mga gingharian ug mga kapanahonan sa iglesia, nga, ang pagbuhat niana sa ilang panahon, usa ka silot sa kamatayon. Ang atubangon mo ang hari ug sultihan siyang, “MAO KINI ANG GINAINGON SA GINOO, mahitabo ang *ingon-ani* ug *ingon-ana*.” pareho ra nga gipaputol mo ang imong ulo. Ipatatay ka sa gilayon sa iglesia sa pagbuhat niana. Apan maisog kadtong mga propeta. Ngano man? Gipalihok man sila sa Espiritu Santo, kita n’yo, ug, sila, mao kana kon nganong maisog sila. Ug ilang gisulat ang—ang dili-mahimong-masayup nga Pulong sa Dios.

114 Daghan kaayo kaniadto ang nanagsulay nga sundogon sila nga mga propeta, sama sa mga sacerdote, o uban pa. Ug unsa ma’y ilang gipangbuhat? Nanglamukat lang hinoon, kana lang. Dili nila kini mahimong sundogon.

Tungod kay, nagpili na ang Dios sa tawo para sa maong kapanahonan, ug gipili na ang Mensahe, ug bisan ang kinaiya sa mao nga tawo ug kung unsa ang mahitabo sa nianang kapanahonan, kung unsa ang mahipatuman Niya, kung unsaon Niya pagbuhat niini, gamit ang kinaiya nianang tawhana, mahimo Niyang butahan ang mga mata sa uban. Ang mga pulong nga igasulti sa nianang tawo, sa paagi siyang maglihok, maoy magabuta sa uban, ug magabukas usab sa mga mata sa uban pa. Kita n’yo? Gibistihan Niya ang mao nga tawo sa matang nga pagkabisti kaniya; ang kinaiya, ang ambisyon, ug ang tanantanan na sa paagi nga mamahimo siyang mao gayud, nga ingon ka eksaktong pagkapili para sa nianang matang sa mga tawo nga iyang pagatawagong para sa nianang kapanahonan.

Samtang, ang uban motindog ug motan-aw lang kaniya, moingon, “Bueno, dili ko gayud mahimo. Adunay . . . Ako—dili ko makita.” Mga binutahan sila.

¹¹⁵ Sa ingon niana usab nga paagi mianhi si Jesus, nga nabistihan, ang dili-mamatay nga Dios nabistihan sa tawhanong unod. Ug tungod kay natawo Siya diha sa usa ka pasungan, sa usa ka kuwadra nga puno sa mga tai, wala ni usa ka luna nga mapahulayan sa Iyang ulo; natawo, nga nasuspetsahan, nga dala-dala ang gitaput nga ilehitimong ngalan diha Kaniya. Kita n'yo? Ang tanan niini nga mga butang kung unsa Siya, ug kung giunsa Niya pag-anhi, usa lang ka anak sa panday, kung unsa nga wala Siya nakaeskwela.

Kapin kun kulang, sa kalibutan, ang kaalam sa niining kalibutan, wala Siya og unsa man nga kahilambigitan niini. Wala ni unsa man sa sibilisasyon sa niining kalibutan, edukasyon, o unsa man, wala Siya'y kahilambigitan ni usa ka butang niini. Ngano man? Dios Siya. Magsumpakiay kini. Kung nagsulay Siya sa pag-eskwela sa usa ka seminaryo sa kon asa man ug tun-an ang usa ka butang nga ginabuhat sa mga kaiglesiahan sa niining kalibutan, kung unsa sa . . . Aba, kini dili man lang . . . aba, kini dili man lang . . . dili gayud kini mosibo sa Iyang salabutan, tungod kay Siya Dios.

Busa, ang edukasyon, ang pag-eskwela, ang mga seminaryo, ug ingon-anang mga butang, walay-duhaduha nga supak sa kabut-on sa Dios. Ang tibuok nga sistemang pang-edukasyon supak sa Dios. Ang tanan nagatudlo palayo gikan sa Dios, sa kanunay. Pagmadungog ko ang usa ka tawong nagaingon nga siya'y Dr., Ph.D., L.L.Q., samot lang siya niana nga ginapahilayo pa gikan sa Dios, para kanako. Kita n'yo? Gi-edukar lang niya ang iyang kaugalingon nga ingon na niana ka halayo gikan sa kung unsa siya'y gitawag aron mamuhat. Husto kana.

Himatikdi kung unsa nga karon gipalihok sila sa Espiritu Santo.

¹¹⁶ Karon, wala kana nagapasabot nga dili na makasulod ang edukadong mga tawo. Tan-awa si Pablo. Siguro wala na'y mas makinaadmanon nga tawo sa iyang adlaw kay sa kang Pablo, nga mao si Saulo nga taga-Tarsus. Nag-eskwela siya sa ilalum ni Gamaliel, ang usa sa pinaka-bantugan nga mga magtutudlo sa maong panahon; halangdon, estriktong Hebreohanon, usa ka Fariseo sa denominasyon. Ug gimatuto kaniadto si Pablo ilalum kaniya. Nahibalo siya sa tibuok nga relihiyong Judio. Apan sa diha nga nakasulod na siya sa iglesia, miingon siya, "Wala gyud ako mianhi kaninyo pinaagi sa edukasyon sa tawo, ug uban pa. Tungod kay, kung mao man, kung ingon-ana magasalig kamo dinha. Apan nagaanhi ako kaninyo sa gahum ug pagpadayag sa Espiritu Santo, aron nga ang inyong pagtoo mapahamutang dinha sa Dios." Tan-awa. Kita n'yo? Husto kana.

¹¹⁷ Daghan ang mga nagsundog-sundog sa niini nga mga tawo, apan gilamukat lang nila ang maong butang sama gayud sa ilang ginabuhat sa karon. Aduna og usa ka tawong mitungha

kaniadto sa wala pa ang panahon ni Jesus, nga miagak sa upat ka gatus ka mga tawo palayo. Ug kabalo na mo kung unsa nga mabasa diha sa Kasulatan ang mahitungod sa niining mga butang, ginasulayan nga buhaton kini nga wala pa ang maong tukmang panahon. Ug ang uban kanila nagsulay nga sundogon Siya, ug silang tanan *ingon-ani*, *ingon-ana*, o *usa* pa. Ug miingon Siya, “Sa kaulahiang mga adlaw, mangtungha sila ingon nga mga mini nga Cristo, sa kaulahiang mga adlaw, ug mini nga mga propeta, ug magapakita sa mga ilhanan ug mga katingalahan.” Aduna na kita og ingon-nianang tanan. Kita n’yo? Apan wala kana nagapawala sa tinuod. Mas ginapasidlak pa sa niini Kini, tungod kay aduna kita og usa ka tinuod nga Cristo, dili usa ka mini.

¹¹⁸ Karon, karon, nahibaloan nato kung ingon-ana nga ang Dios nagapadala sa Iyang mga propeta. Mao kana kaniadto ang paagi Niya sa paghatud sa Iyang Pulong ngadto sa mga tawo, ang pinaagi sa mga baba sa Iyang mga propeta.

Ug himatikdi, kabalo na mo, nag-ingon si Moises, kung gusto ninyong basahon kini diha sa Exodo sa ika-4 nga kapitulo, ug sa ika-10 ug ika-12 nga bersekulo. Nag-ingon si Moises nga nakigsulti ang Dios kaniya. Nakigsulti ang Dios ngadto sa usa ka tawo, baba ngadto sa dalunggan. Ug miingon siya, “Mahinay ako nga mamulong,” ingon ni Moises. “Ako, wala ako’y ikasarang. Ako—dili ako mahimong moadto.”

¹¹⁹ Miingon Siya, “Kinsa man diay ang nagpasulti sa tawo, o Kinsa man ang nagbuhat sa tawo nga mamahimong amang? Kinsa man ang nagbuhat kaniya aron makakita, o Kinsa man ang nagbuhat kaniya aron makadungog? Dili ba Ako, ang Ginoo?” Miingon, “Ako magauban sa imong baba.” Kita n’yo? Busa . . .

¹²⁰ Ug nag-ingon si Jeremias, kung gusto ninyong basahon kana diha sa Jeremias 1:6. Miingon si Jeremias nga, “Nagbutang ang Dios og mga pulong diha sa akong baba.” Kita n’yo? Siya—Nakigsulti Siya, baba ngadto sa dalunggan, sa usa ka propeta; ug nagsulti pinaagi sa usa pa ka propeta, nga wala man lang siya og unsa man nga pagkontrolar, ug nagsulti pinaagi sa iyang mga ngabil niini.

¹²¹ Aduna Siya’y mga pamaagi sa pagpahayag sa Iyang Pulong, kabalo na mo. Oo, sir. Busa makita ninyo nga ang Biblia Pulong sa Dios, dili pulong sa tawo.

Miingon si Moises, “Misulti ang Dios kanako pinaagi sa usa ka Tingog, ug nadungog ko Siya. Gipangsulat ko ang Iyang mga giingon.”

¹²² Miingon si Jeremias, “Dili man lang ako makasulti. Ug, ang unang mahibaloan mo, nagasulti na ang akong mga ngabil, ug—ug—ug nagasulat na ako.” Nagsulti ang Dios pinaagi sa iyang mga ngabil, ug natuman kini.

Si Daniel, si Isaias, ug uban pa, ang tanan niadtong mga propeta halos pareho ra.

¹²³ Kabalo mo, diha lamang sa Daang Tugon, sobra na sa duha ka libo ka higayon nga nagsulti kadtong mga propeta og MAO KINI ANG GINAINGON SA GINOO. Karon, kung moingon ang usa ka tawo og MAO KINI ANG GINAINGON SA GINOO, dili na ang maong tawo ang nagasulti. Kung buhat-buhaton man niya, dili siya mamahimong usa ka propeta, mamahimo siyang usa ka tigpakaaron-ingnon, kita n'yo, tungod kay dili (gayud) kini mamatuman; usa ka posibilidad sa napulo ka gatus ka libong mga higayon, kita n'yo, mahimong salagmaon nila kini. Apan kung kini'y MAO KINI ANG GINAINGON SA GINOO, ang Ginoong Dios gayud ang nagsulti niini.

Kung moingon ako, "Mao kini ang ginaingon ni Orman Neville"; moingon ang igsoon ko, "Mao kini ang ginaingon ni Mr. Mann"; moingon ko, "Mao kini ang ginaingon ni Igsoong Vayle," dinhi, o uban pa sa niining mga kaigsoonan, kinsa man kaninyo; ginasulti ko kung unsa ang inyong gisulti. Kung matitud-anon ako, isulti ko kung unsa lang ang inyong gisulti.

Ug kining mga kalalaken-an, ingon nga mga propeta, nanagingon, "Dili niini ako. Wala ako og unsa man nga kahilambigitan niini, apan kini'y MAO KINI ANG GINAINGON SA GINOO." Busa ang Biblia mao ang MAO KINI ANG GINAINGON SA GINOO pinaagi sa mga propeta.

¹²⁴ Himatikdi, ilang nadawat ang Espiritu ni Cristo diha sa ilang mga kaugalingon, ug nangtagna sa mga panghitabo nga magakahitabo. Kung paghisgotan ang mga pagtagna! Gipangsulti nila kung unsa ang magakahitabo sa tanang mga kapanahonan, samtang nga nanglingkod sila, nagtindog, naghigda, naglakaw uban ang Espiritu ni Cristo diha kanila, nga halos naglihok sila nga sama na ni Cristo. Ug ang mga nagabasa mobasa niini ug maghunahuna nga nagasulti ang maong mga propeta mahitungod sa ilang mga kaugalingon.

Nahinumduman ba ninyo ang eunoco sa diha nga gibasa niya ang Isaias 53:1, kung unsa, nga, "Gisamaran Siya tungod sa atong kalapasan, napangos tungod sa atong mga kasal-anan, ang silot sa atong pakigdait diha sa ibabaw Niya, tungod sa Iyang mga labod kita nangaayo"? Miingon ang maong eunoco kang Felipe, "Kinsa man ang gihisgotan dinhi sa propeta, siya ba mismo o laing uban nga tawo?" Kita n'yo, nagsulti ang propeta sama nga daw siya mismo kadto.

¹²⁵ Tan-awa ninyo si David nga nagahilak diha sa Espiritu. "Dios ko, Dios ko, nganong gibiyaan Mo ako? Ang akong mga bukog, nagatutok sila kanako, dinhi kanako," si David. "Gipalagbasan nila ang akong mga tiil ug ang akong mga kamot. Apan dili Mo pagabiyaan ang akong kalag sa sheol, ni motugot Ka nga ang Imong balaan makakita sa pagkadunot," sama nga

daw sa nagasulti si David mahitungod sa iyang kaugalingon ingon nga balaan. Ang Anak kadto ni David, kadtong mitubo, espirituhanong Binhi nga nagagikan dinha. Bisan nga si David mismo usa ka amorseko, apan sa sulod dinha mao ang usa ka lugas sa Trigo. Nasabtan ba ninyo kini?

Busa, ang tibuok Biblia dili pulong sa tawo, ni gisulat man Kini sa tawo, gihatud sa tawo, o dili usab Kini mahimong—mahimong gipahayag gikan sa tawo. Pulong Kini sa Dios nga gipahayag sa Dios Mismo, ang Kaugalingon Niyang Tighubad, si Cristo nga ginapadayag ang Iyang Kaugalingon diha sa Kaugalingon Niyang Pulong.

¹²⁶ Tan-awa si Cristo nga atua kaniadto kang David. Dili gani makapaghunahuna si David ha. Wala na kaniya ang iyang panghunahuna, mora'g ingon-ana. Ug nagbitay Siya didto sa krus, sama sa makita ninyong estatwa dinhi; nagbitay didto sa krus, nga nagahilak, “Dios ko, Dios ko, nganong gibiyaan Mo Ako? Ang tanan Kong mga bukog, nagatutok sila Kanako. Gipalagbasan nila ang Akong mga kamot ug Akong mga tiil. Ilang gidughang ang Akong kilid.” Kita n’yo? “Ngano nga halayo Ka kaayo gikan Kanako? Ang tanang vaca nga lake sa Basan gipalibotan Ako. Ginalingo-lingo nila ang ilang mga ulo, nga nagaingon, ‘Misalig Siya sa Dios, nga Iya Siyang pagaluwason; karon tan-awon nato kung pagaluwason ba Niya Siya,’” mao ra nga mga pulong ang ginasulti.

Busa, nakita ninyo, sa diha nga nadayag ang Dios ibabaw sa yuta dinhi, gisulti Niya ang mao rang mga pulong nga gisulti ni David. Nakuha ba ninyo kini? Busa, nakita ninyo, dili Kini pulong sa tawo; Pulong Kini sa Dios. Ang Dios anaa kaniadto kang David; dili kadto si David. Wala siya nakahibalo kung unsa kaniadto ang iyang ginapanulti; atua ra gayud siya sa Espiritu.

Ingon niana si Moises kaniadto. Tuman siyang atua sa Espiritu, migawas sa dimension nga iyang gikapuy-an, ug nagtindog didto nga nawong sa nawong, didto niadtong nagadilaab nga sapinit, nga nagapakigsulti ngadto—ngadto—ngadto sa Dios Mismo. Miingon, “Huboa ang imong mga sandalias. Ang dapit nga imong gitindogang yuta balaan.”

Mahunahuna ko nga sa dihang mibiya na si Moises didto, sa hunahuna niya, “Unsa ang nahitabo? Unsay nahitabo? Unsa kaha kadto?”

Miingon, “Pag-adto sa Egipto. Ako magauban kanimo.”

Miingon siya, “Tinuod kaayo kadto para kanako, kinahanglan kong moadto.” Gikuha niya ang iyang asawa ug ang iyang mga anak. . . ug—ug ang iyang anak, diay, ug ang iyang sungkod diha sa iyang kamot, ug milakaw paingon sa Egipto, aron luwason ang mga tawo. Kita n’yo?

¹²⁷ Nagasulti ang Dios, Mismo, pinaagi sa mga propeta. Kita n’yo, sila, sila walay pagduhaduha. . . Dili ang mga propeta

kadto; ang Dios kadto. Tungod kay, ang propeta, sa ila lang mga kaugalingon, dili nila masulti kadtong mga butanga.

“Kinsa ba’y nakatoo sa among balita?” si Isaias nga nagasulti, nakita n’yo. “Kinsa ba’y nakatoo sa among balita? Kang kinsa man gipadayag ang bukton sa Ginoo? Siya magalumpat sa atubangan kanato ingon nga usa ka nating vaca diha sa usa—usa ka toril. Ug kung unsa nga, bisan pa man, gisamaran Siya tungod sa atong kalapasan, napangos tungod sa atong mga kasal-anan, ang silot sa atong pakigdait diha sa ibabaw Niya; tungod sa Iyang mga labod kita nangaayo.” Nangaayo kita, hangtud dinhi sa karon nga kapanahonan; ug si Isaias kini, didto kaniadtong walo ka gatus ka tuig sa wala pa si Cristo. Kita n’yo? “Pinaagi sa Iyang mga labod kita kaniadto,” panahon nga nangagi na, human na, “giayo na.” Oh, sus!

Ang Pulong sa Dios, gayud, hingpit kaayo! Saligi Kini, mga igsoon. Kini ang bugtong butang nga makaluwas kaninyo.

¹²⁸ Ang tanang uban pa nga mga pulong, dili ko igsapayan kung giunsa man pagplastar ang mga niini, unsa mang paagi, kang kinsa man gikan, unsa man nga denominasyon nagagikan, o unsa pa ka maalam ang mao nga tawo, kinahanglan dili gyud kini tagdon, ang bisan unsa man nga supak sa Pulong. Kung gusto ninyong isulat kana nga Kasulatan, kini sa Mga Taga-Galacia 1:8. Kita n’yo? Nag-ingon si Pablo, “Bisan pa kami, o usa ka manolunda gikan sa Langit, magwali kaninyo og laing butang gawas Niini nga inyo nang nadungog, ipatunglo siya.”

Sa laing sinultihan, kung may usa ka Manolunda ang moanha kaninyo gikan sa Langit, usa ka nagasidlak og madan-ag nga Manolunda, ug motindog; sus, mamahimo gayud kana nga paon para sa niining panahon, dili ba? Usa ka nagasidlak og madan-ag nga Manolunda nga mosaka dinha ug motindog, ug magsulti og mga butang nga supak sa Pulong; sultihan ninyo, “Satanas, pahilayo ka kanako.” Husto. Kung usa siya ka obispo, kung usa siya ka . . . unsa man siya, ayaw gayud siya toohi kung wala siya nagasulti og eksakto nianang Biblia, Pulong sa Pulong. Bantayi ninyo siya, dalhon niya kamo pinaagi sa Biblia. Dalhon niya kamo sa usa ka punto, ug dayon bingwiton kamo mismo dinha. Pagmakita ninyo ang Biblia nga nagasulti og usa ka butang, ug iya kanang ginasayloan, bantayi siya mismo dinha.

Kita n’yo, ingon niana ang gibuhat niya kang Eva. Miduol siya mismo didto ug eksaktong giingon ang tanan. “Bueno, *ingon niini* ang gisulti sa Dios.”

“Husto kana, Eva. Amen. Ginatoohan nato kana, tanan.”

“Bueno, *ingon niini* ang gisulti sa Dios.”

“Amen. Ginatoohan nato kana, tanan.”

“*Ingon niini* ang gisulti sa Dios.”

“Nagatoo kita niana, sigurado.”

“Bueno, apan nag-ingon ang Dios nga mamatay kami.”

¹²⁹ “Bueno, ha, kabalo ka nga usa Siya ka buutan nga Dios.” Wala man Siya nag-ingon nga dili Niya buhaton, kabalo na mo. “Apan siguradong . . .” Oh, mao gyud! Tan-awa siya.

Ug kung ingon niana siya ka malimbongon, ug nag-ingon ang Biblia, “Sa kaulahiang mga adlaw pagalimbongan niya ang mga Pinili kon mahimo pa,” asa na kaha kita karon angay’ng mapaingon, mga higala? Karon, kining gamay nga leksyon pang Sunday school, kinahanglan nga medyo mapahiduol gayud, kabalo na mo, ngadto sa atong mga kasingkasing, aron nga makita . . . Angay gyud nato paminawon og ayo ug makita kung unsa na ka malimbongon kana nga butang karon.

¹³⁰ Himatikdi, dili kita mahimo, kinahanglan nga dili gyud kita, maminaw sa unsa man nga laing ubang pulong sa tawo. Bisan pa kon unsa pa siya ka maalam, unsa pa ka edukado. Ang Biblia, diha sa Mga Proverbio, nagaingon, “Kinahanglan isalikway nato ang mga pagpangatarungan.” Kita n’yo? Karon, dinhi sa ikaduhang pang-tawhanong bahin . . .

Ang nahaunang bahin mao ang inyong mga sensya sa igtatan-aw, igititilaw, igbabati, igsisimhot, ug igdudungog. Anaa kana sa panggawas ninyo nga lawas.

Diha sa pangsulod nga lawas, nga mao ang espiritu, mao ang pagpangatarungan ug panghunahuna, ug uban pa. Kinahanglan ato kana tanan isalikway. Dili puedeng mangatarungan, moingon, “Karon kadyut lang, kung ang Dios usa ka buutan nga Dios . . .” Ug nasultihan kita sa makadaghang higayon karon nga Siya maayo gayud. “Kung Siya usa ka maayong Dios, nan kung sinsero ako, bisan pa man nga dili ko kini makita sa nianang Biblia nga husto kini, basta sinsero lang ako, maluwas ako.” Malaglag gyud ka. [Blangko nga bahin sa teyp—Ed.]

¹³¹ “Kung nagasimba ako ug ginabuhat lang ang mga butang nga sa pagtoo ko’y husto, ug paninguhaon nga mobarug sa kung unsa ang tan-aw ko’y husto, bueno, ako . . .” Malaglag ka gyud sa gihapon.

“Adunay usa ka dalan nga daw matarung alang sa tawo, apan ang katapusan niana mao ang mga dalan sa kamatayon.” Kita n’yo? Dili ka maluwas; malaglag ka. Kita n’yo? Kita n’yo? Kinahanglan niini mao kanang Tawong nagakontrolar sa sulod.

¹³² “Bueno, nagsulti man ako sa laing mga dila, Igsoong Branham. Bueno, wala ka ba diay nagatoo sa pagsulti diha sa laing mga dila, Igsoong Branham?” Nagatoo gyud ko. “Bueno, nagsinggit ako; wala ka ba nagatoo niana?” Nagatoo ako, sir. “Nagkinabuhi ako sa usa ka maayo nga Cristohanong pagkinabuhi. Wala ka ba nagatoo niana?” Nagatoo ako, sir. Apan wala kana sa gihapon nagapasabot nga luwas ka. Usa ikaw ka maayong tawo; mahinlo, matarung, balaan, buutan nga tawo.

Mao man usab kadtong mga sacerdote, mga relihiyoso sa kinauyokan, pagkarelihiyoso kaayo hangtud nga usa ra ang masaypan sa pagsabut, pagabatohon sila hangtud mamatay. Ang silot sa pagbinuang sa Pulong sa Dios kaniadto mao ang kamatayon.

¹³³ Mao kana ang nagakahitabo sa atong nasud sa karon. Ang hinungdan nga daghan kita kaayo og mga kaluagan sa kalibutan sa karon, dili man igo ka grabe ang mga silot. Kung ang usa ka lalaki madakpan nga nagpuyopuyo uban sa usa ka babayeng asawa sa uban, kinahanglan silang dalhon atubangan sa publiko ug kaponon, mismo, nga dayag, ug buhian. Husto kana. Kung ang usa ka tawo madakpan nga nagabuhat og unsa man nga dili-husto, diha sa dalan, nagapahagurus, dili siya angay silotan lang nga ubos sa napulo ka tuig; siya'y ti. . . tinuyo man kini nga pagpatay. Kita n'yo? Pagmobutang kamo og mga silot nga sama niana, mapahinayhinay mo sila.

Apan pag ang usa ka baliko nga pulitiko makahimo sa paghisgot *nining* usa dinhi ug palusoton kini, ug moingon, "Buena, nakainum lang siya og gamay, siya'y. . . wala man niya gituyo nga buhaton kadto." Ug mopatay og usa ka lalaki, sa asawa niini, ug sa tibuok pundok sa mga anak niini nga walay-sala, tugotan ang maong Ricky nga lusotan kini, pamulitika kana. Ingon niana ang kalibutan. Ingon niana ang yawa.

¹³⁴ Nag-ingon ang Dios nga kung ang usa ka lalaki masakpan diha sa pagpanapaw, o usa ka babaye, dalhon sila didto sa gawas ug batohon sila hangtud mamatay. Mao na kana. Kita n'yo? Kung masakpan siya bisan sa pagpudyot lang og usa ka kahoy, sa adlaw nga sabbath, "Dalha siya ug batoha ninyo siya." Gikinabuhi nila kini kaniadto. Ug karon, kita n'yo, wala na kita og ingon niini nga mga matang sa balaod karon.

Apan ang Cristohanon, ang iglesia, kung unsa ang ginahisgotan ko karong buntaga, kana nga balaod sa Dios anaa sulod sa inyong kasingkasing. Kita n'yo? Wala kamo'y tinguha nga buhaton kana. Anaa kini sa sulod dinhi. Gusto ninyong tumanon sa hingpit ang kasugoan sa Dios. Bisan kung unsa pa kini, basta gusto lang ninyo nga mamahimo kung unsay. . . Kung—kung nagkinahanglan ang Dios og usa ka trapo sa pultahan, gusto Niya nga ikaw kanang mamahimong trapo, malipayon ka kaayo nga mamahimong ingon niana. Bisan kung unsa pa pagkahimo niini, gusto mo nga mamahimong maong trapo. Kita n'yo? Bisan unsa man ang gusto sa Dios nga ipabuhat kanimo, mao kana ang gusto mong buhaton, tungod kay ang Dios kini. Karon, dinha kon diin mo gayud nga makaplagaan ang imong tinuod, lunsay, matuod nga gugma para sa Dios.

¹³⁵ Karon makita nato kung ingon-ana, nga, "Ang Manolunda nga magawali og unsa man nga lahi," gawas sa kung unsa'y nawali na, nga nasulti na diha sa Biblia, "ipatanglo siya."

Walay bisan kinsa ang makahimo. Dili ninyo kana mahimo; kinahanglan nga eksakto lang sa pagkasulti Niini.

¹³⁶ Ug mabasa nato usab, diha sa Pinadayag 22:18 ug 19, “Kung aduna ma’y tawo nga magadugang og usa ka pulong ngadto Niini, o motaktak og usa ka Pulong gikan Niini, pagataktakon sa Dios ang iyang bahin gikan sa Libro sa Kinabuhi.” Husto. Pagataktakon gayud sa Dios ang iyang bahin, bisan kung usa pa siya ka ministro, mahimong bisan unsa pa siya, ug nga ang iyang pulong. . . nga ang iyang ngalan nakalista man sa Libro sa Kinabuhi. Nag-ingon ang Dios, “Pagapanason Ko kini mismo,” husto kana, “kung magadugang siya og usa ka butang ngadto Niini, o magataktak man og usa ka Pulong gikan Niini.” Ingong niana ka dili-mahimong-masayup ang paghimo sa Dios sa Iyang Pulong. Kita n’yo? Mahimo kamong modugang sa iglesia, o motaktak gikan sa iglesia. Ayaw gayud dugangi kana nga Pulong, o taktakan Kini, tungod kay pagataktakon sa Dios ang inyong ngalan mismo sa Libro sa Kinabuhi. Ug, kana, tapos ka kung ingon-ana. Kita n’yo? Dili kamo mahimong modugang Niini, o motaktak gikan Niini. Kini eksakto lang kung unsay. . .

¹³⁷ Wala Kini nagkinahanglan og tighubad, kay ang Biblia nag-ingon nga ang Dios ang nagabuhat sa Kaugalingon Niyang paghubad sa Biblia. “Wala Kini og unsa man nga kinaugalingon nga paghubad,” ang ingon ni Pedro. Sige.

¹³⁸ Ug ang tibuok Kasulatan gituga sa Dios, gihan-ay sa Dios, ug ang maong tibuok butang mao ang kapadayagan ni Jesus Cristo. Ang Bag-o ug ang Daang Tugon, kon diin ilang gisulti nang daan ang Iyang pag-abot, kung unsa ang Iyang pagabuhaton pag-anhi Niya dinhi, ug kung unsay Iyang buhaton diha niining kapanahonan nga magaabot. Busa nagapahimo kana Kaniya nga mao sa gihapon kagahapon, karon, ug hangtud sa kahangturan. Kita n’yo?

Sama dinha sa Mga Hebreohanon, sa diha nga gisulat kini ni Pablo. Siya’y Dios, “Si Jesus Cristo nga mao kagahapon,” sa Daang Tugon. Siya maoy “Si Jesus Cristo sa karon,” nga nadayag diha sa unod. “Ug Siya si Jesus Cristo hangtud sa kahangturan,” diha sa Espiritu, “nga moabotay.” Kita n’yo? Kita n’yo? “Mao sa gihapon kagahapon, karon, ug hangtud sa kahangturan.”

Ug buhi Siya sa dayon aron buhaton nga buhi ang Iyang Pulong sa kung unsa ang giingon na Niini nga buhaton Niini para sa nianang kapanahonan. Buhi Siya.

¹³⁹ Buhi Siya diha sa Daang Tugon, nga nadayag. Gusto ko lang ipakita kaninyo ang usa ka gamay nga butang dinhi, kung okey pa sa inyo. Himatikdi, sa diha nga nadayag si Jesus diha sa Daang Tugon, ingon nga ginatoohan nato kini.

Karon, kamong mga magwawali dinha, mahimo ninyong lalison kini, buhaton kung unsa man ang gusto ninyo, apan

nagapakigsulti ako alang sa akong...kunsa unsa ang sa hunahuna ko. Kita n'yo?

¹⁴⁰ Sa diha nga nadayag si Jesus diha sa Daang Tugon, sa usa ka theophany, sa persona ni Melchisedec; dili usa ka kaparian, kondili ang Persona, ang Tawo. Kita n'yo? Kay, kini nga Tawo wala pa natawo niadtong tungora, apan dinha Siya sa usa ka theophany, busa wala Siya'y amahan, walay inahan. Siya'y Dios Mismo. Nadayag Siya diha sa porma sa usa ka Tawo, gitawag nga, "Hari sa Salem, nga maoy Hari sa Pakigdait, ug Hari sa Pagkamatarung." Kita n'yo? Siya kaniadto si Melchisedec. "Wala Siya'y amahan ni inahan, walay sinugdan sa mga adlaw bisan katapusan sa kinabuhi." Kita n'yo? Si Jesus kadto diha sa usa ka theophany, sa porma sa usa ka tawo. Masundan ba ninyo kana? Sige.

¹⁴¹ Dayon nahimo Siyang tawhanong unod, ug nagpuyo ipon kanato, diha sa Persona ni Jesus Cristo Mismo, nga natawo sa ulay nga si Maria. Mianhi Siya sa niana nga porma aron nga mahimo Siyang mamatay, ug mibalik na ngadto sa Langit.

Karon sa niining kaulahiing mga adlaw, misaad Siya nga igapadayag Niya ang Iyang Kaugalingon pag-usab diha sa maong kahupnganan, sa Iyang unod, sa Espiritu. Kita n'yo? "Kay maingon sa nahitabo kaniadto sa mga adlaw sa Sodoma, maingon man usab sa mga adlaw sa Pag-abot sa Anak sa Tawo." Karon tan-awa ang Sodoma, kung unsa na ang kahimtang niini, ug kung unsa na ang nagakahitabo. Ug si Jesus Cristo ingon nga nadayag diha sa pormang lawas, sa Iyang Iglesia karon, kita n'yo, nga ginabuhat ang mao rang butang, mao rang buluhaton, mao rang mga butang nga Iyang ginabuhat sa tanang panahon, wala gyu'y pagkabalhin, ang Maong Usa nga Eternal. Kita n'yo? Ug diha sa kalibutan karon, Iyang gipadayag ang Iyang Kaugalingon diha sa tawhanong mga lawas, sa tawhanon natong mga lawas nga Iyang gitawag, ug eksaktong gipamuhat ang mao rang butang nga Iyang gibuhat kaniadto sa makadaghang higayon, ug sa panahon sa Iyang pagkaunod kaniadto dinhi sa yuta. Ug ginabuhat ang mao rang butang sa karon, tungod kay, "Ang Dios, sa karaang panahon nagasulti sa makadaghang higayon ngadto sa mga ginikanan pinaagi sa mga propeta, sa niining kaulahiing mga adlaw nagasulti kanato pinaagi sa Iyang Anak, si Jesus Cristo." Kita n'yo, ang Anak nga ginapadayag na sa kaulahiing mga adlaw, ang Dios nga nadayag diha sa tawhanong unod, nga nagakahitabo sa dili pa ang pagkagun-ob sa Sodoma, ang katapusan sa kalibutang Gentil. Nakita ba ninyo kini?

Tulo ka mga pagpadayag.

¹⁴² Karon, ang sunod nga butang nga mahitabo, maoy sa diha nga kining tanan pagatigumon ngadto nianang usa ra ka Persona, si Jesus Cristo, ang Pangasaw-onon ug ang Lawas, diha

na sa pisikal nga pagbalik ni Ginoong Jesus. Ginahimo ang Iyang tulo ka higayon nga . . . Sa diha nga gidala Siya sa yuta; gipatay, gilansang, gibanhaw. Ginapadayag na ang Iyang Kaugalingon diha sa porma sa Iyang Lawas, nga mao ang Iyang Pangasaw-onon, ang Babaye. Nakuha ba ninyo kini? Kabahin sa Iyang Lawas ang mao nga Babaye.

Ug ang babaye ug lalaki haduol kaayo sa usa'g usa, hangtud nga sila'y halos . . . Pareho na sila. Angay lang mamaingon niana sila, bisan unsa pa. Mao kana sila, kita n'yo, nadayag sila nga eksaktong pareho. Kabahin ang babaye sa lalaki, tungod kay gikuha ug babaye gikan kaniya.

Ug ang Pangasaw-onon karon kinuha gikan sa lawas ni Cristo, nga eksaktong nagalihok ug nagapamuhat sama sa Iyang giingon nga buhaton Niini para sa niining panahon, ang Pangasaw-onon, ang Reyna; ang Hari ug ang Reyna. Sige.

Halos udto na, busa kinahanglan natong dalion ug tapuson.

¹⁴³ Sige, ang tibuok Biblia mao ang tibuok kapadayagan ni Jesus Cristo, nga ginapaila ang Iyang Kaugalingon ngadto sa matag kapanahonan. Iyang gipaila kaniadto ang Iyang Kaugalingon niadtong mga adlaw ni Luther, ingon nga usa ka pundasyon; ang iglesia, ang tiil, ang batiis.

Sama sa Iyang gibuhat kang Haring Nabucodonosor; nahinumduman ba ninyo sa unsa nga gidamgo niya kadto nga mga damgo, ug misugod sa ulo paubos? Kita n'yo? Karon nagasugod usab Siya sa tiil pataas. Kita n'yo? Sa gingharian sa Babilonia gipakita Niya tanan kadtong mga sa Daang Tugon, misugod Siya sa ulo paubos, hangtud nga mikanaug Siya ang Dios Mismo nga nahimong unod diha sa pinakatiilan na nga bahin. Karon dinhi sa Bag-ong Tugon, ginabalik Niya ang Iyang Kaugalingon mismo pataas, paingon na usab ngadto sa Ulo, ang Ulo nga bulawan, aron nga pagapurongpurongan. Kita n'yo? Tan-awa. Nasabtan ba ninyo kini?

Kita n'yo, ang Dios atua sa sinugdanan, ug padayon Siyang nagapaubos, pinaagi sa mga propeta, ug padayon nga nagapaubos, hangtud ang Dios Mismo nahimong tawo nga sama kanato, paubos diretso ngadto sa pinakatiilan na sa maong hagdanan, usa ka Bata nga natawo diha sa usa ka pasungan; gikadumtan, gisalikway, gitamay, ug gibansagan og dili maayo, ug tanan na kung unsa Siya kaniadto. Dayon misugod Siya sa pagsaka, kita n'yo, ug gikan sa pinaka-tiilan misugod Siya sa pagtukod sa Iglesia, ang Pangasaw-onon, nagabalik, padayon nga nagabalik; ug karon paingon na ngadto sa pagka-Pangulong Bato, kon diin ginahugpong niini ang tanan-tanan ug ginahimong usa ka dakung gibag-ong dagway nga Lawas ni Jesus Cristo.

¹⁴⁴ Mahipadayag ang Dios sa matag kapanahonan pinaagi sa Iyang gisaad nga Pulong para nianang kapanahonan. Karon tan-

awon nato kung unsa ang pipila sa Iyang mga saad para sa karong panahon, sa diha nga nagatapos na kita karon sa niining ulahing mga pulong.

¹⁴⁵ Karon ginapadayag sa Dios ang Iyang Kaugalingon diha sa panahon sa pang-gabiing Kahayag. Tan-awon nato karon. Makita natong . . .

¹⁴⁶ Aduna ko’y usa ka pundok sa mga Kasulatan nga nasulat dinhi. Sama sa makita ninyo sa niining panid, kung unsa ka daghang mga Kasulatan ang nasulat dinha. Apan, aduna kita og mga kinse minutos na lang og mag-alas dose na. Gusto ko nang humanon. Ug wala ako napagaw, karong buntaga, sa pagwali. Usahay kining mga airconditoner dinhi ang nagapapagaw gayud kanako.

Busa kung si Igsoong Neville wala’y . . . Aduna ka na ba og unsa man para unyang gabii? [Nagaingon si Igsoong Neville, “Wala.”—Ed.] Bueno, bueno, akong . . . Kung okey lang, aduna ako. Nakakita ako og usa ka pakete sa sigarilyo, sa miaging adlaw, nga gilabay didto sa mga kakahoyan; ug nakakuha ako og usa ka Mensahe gikan nianang pakete sa sigarilyo, para unyang gabii, kon itugot sa Ginoo. Kita n’yo.

Busa, aduna ako og niining mga Kasulatan dinhi. Ug dili ko gustong magsobra sa oras, aron nga makabalik pa kamo.

¹⁴⁷ Usa ka pakete sa sigarilyo, nga may mensahe. Sige. Nagalakaw ako didto sa mga kakahoyan, ug didto may gilabay nga usa ka pakete sa sigarilyo, ug padayon lang ako nga milakaw. Sa hunahuna ko, “Siguro, may tawong nag-una kanako.”

Ug May Sa Kung Unsa nga nag-ingon, “Balik ka ug pudyota kadto.”

Sa hunahuna ko, “Usa ka pakete sa sigarilyo pudyoton ko? Dili puede kanako.”

May Sa Kung Unsa nga miingon, “Balik ka ug pudyota kadtong pakete sa sigarilyo.”

Ug sa pag-adto ko, didto ang usa ka daan na nga paketeng walay-unod, ug may sa kung unsang butang nga nakita ko. Sultihan ko kamo bahin niini, unyang gabii, kon itugot sa Ginoo. Sige.

¹⁴⁸ Karon magahisgot kita mahitungod sa mga pang-gabiing Kahayag, sa pipila lang ka mga minuto. Nagsulti nang daan ang Biblia nga magaabot ang usa ka panahon, dinha sa katapusan na nga panahon, nga mapalong ang adlaw, ug magkaaduna og pang-gabiing Kahayag. Nahibalo kitang tanan niana. Dili ba? Kita, kita’y . . . Kita nga mga nasayod na sa atong Mensahe sa karon gikan kang Ginoong Jesus, nagatoo kita nga magkaaduna og usa ka pang-gabiing Kahayag. Ug kining pang-gabiing Kahayag . . .

Siyempre, magaabot ang dakung Kahayag sa diha nga mahipadayag na si Jesus Mismo dinhi sa yuta, o diha sa Kalangitan, nga ginasakgaw na ang Iyang Pangasaw-onon, ug dayon mosulod na ang Milenyum.

¹⁴⁹ Apan ania kanato ang usa sa pinaka-makalilisang sa mga panahon nga magaagi, nga sukad-sukad maagihan sa katawohan sa umalabot. Ug ginahulat ko na lang ang maong takna, ug sa diha nga makakuha kita og . . . makakuha ang tanan og usa ka kahigayonan kon diin nga libre kamo sa trabaho ug makagahin og pipila ka mga adlaw, ug makapabilin kita sa usa ka lugar kon diin makapaghisgot ako bahin sa nianang mga Hampak ug mga butang nga magaabot sa kaulahiang mga adlaw; ug mogahin og mga duha o tulo ka mga semana nga magkauban, ug pagahisgotan kana tanan, kung tugotan sa Ginoo nga buhi pa ako aron mabuhat kini ug dihogan ako aron mabuhat ang maong butang, makita kung unsaon kini nga mga butang nga igapadayag, ug lakip nianang mga Dalogdog. Kung ingon-ana mahibaloan na ninyo bahin sa kung unsa ba ang ginadamgo sa kadtong tawo ug silang mga tawo, ug ang tanang uban pa niining mga butang dinha, magakahitabo kini; kita n'yo, makita na ninyo kung unsa ang ginapadayag, niadtong dakung Dalogdog nga nagagikan didto sa—sa mga kawanangan. Karon, siyempre, ang tibuok nga pundok ninyo, nasayod kamo nga nahibalo ako kung unsa nianang—kung unsa ang kahulogan niana, nakita n'yo. Ug, apan maghulat lamang kita hangtud nga moabot ang maong panahon, nakita n'yo, nga mahitabo kini, kita n'yo, karon, ug mahitabo kini ilabina sa iya nang panahon niini.

¹⁵⁰ Karon, busa basahon nato ang pipila sa niining—niining mga Kasulatan dinhi. Karon, sa pag-abot sa pang-gabiing Kahayag, karon, makita nato nga kini nga Kahayag mamahimo nga mao ra nga Kahayag nga anaa sa buntag.

Tungod kay, wala man og ingon-ana nga may usa ka adlaw sa buntag ug lain na usab nga adlaw sa hapon. Ang mao ra kini sa gihapon nga adlaw. Ang mao ra nga adlaw sa hapon ang mao ra nga adlaw diha sa buntag; pareho ra diha sa buntag ang anaa sa hapon.

Karon, nagsulti Kini, “Ang mao nga adlaw mismo,” ang adlaw sa taliwala nianang panahon, “mamahimong mora og sama sa, oh, medyo usa ka mangiub, mangitngiton nga adlaw. Dili mahimong matawag nga adlaw o gabii, tunga-tunga ra niana.”

¹⁵¹ Kita n'yo, kana mao ang pagporma sa Lawas, gikan sa tiil, pataas. Sa ania pa Siya sa yuta, Siya mao ang Anak, ang Kahayagan, dayon gipatay Siya. Ang Iglesia nagpuli sa Iyang lugar, dayon miabot ang pagpang-martir ug mipaingon kini ngadto sa Mangiub nga mga Kapanahonan, ug nagsugod sa pagtukod ibabaw sa maong pundasyon pagkagawas na.

Kung ingon-ana asa na man nagagikan ang igtatan-aw? Sa pinaka-ulo.

Nakita n'yo kana nga panan-awon; ni Nabocodonosor? Makita Siyang nagapaubos, sugod niadtong sinugdan sa kapanahonang Gentil sa wala pa gibubo ang Dugo para kanila ug naghimo og usa ka pangbayad-sa-sala. Sila'y mga kinabig nga nahipasulod. Apan himatikdi nga mipadayon kini nga mikanaug, mikanaug mismo, mikanaug diretso ngadto sa pinakaubos, sa pagsimbolo, kita n'yo, gipakanaug.

Dayon misugod kini pagbalik, nagabalik, ang Iglesia gikan sa tiil, pataas na. Karon ania na kini sa panahon sa ulo—panahon sa ulo. Karon himatikdi ang maong Kahayag.

¹⁵² Dili kamo makakita pinaagi sa inyong mga kamot, bisan pa man nga kabahin kini sa lawas. Dili kamo makakita pinaagi sa mga dalunggan, bisan pa nga makadungog kini. Dili kamo makakita pinaagi sa ilong, bisan pa man nga makasimhot kini. Dili kamo—dili kamo makakita pinaagi sa mga ngabil, bisan pa man nga makasulti kini; kita n'yo, kapanahonan kana sa Pentecostal. Apan karon ania na kini sa panahon sa mata, ang igtatan-aw. Kita n'yo? Karon, wala na'y galamhang nagalihok nga lagpas pa sa mata. Husto ba kana?

Ang sunod mao na ang intelihensiya, nga mao si Cristo na Mismo, Nga mao ang nagakontrolar sa tibuok nga Lawas.

Wala na'y nagalihok, mga paglihok lagpas pa niana. Kita n'yo? Ang tanang uban pa milihok na. Kita n'yo? Malihok ninyo ang inyong tiil, malihok ninyo ang muskulo diha sa inyong mga batiis, malihok ang tanan-tanan. Malihok ninyo. . . Makalihok ang inyong mga dalunggan, ang inyong ilong, ang inyong mga ngabil, ug uban pa. Apan paglagpas sa inyong mga mata, wala na og bisan unsa man nga nagalihok.

Mao kana kon nganong ginaingon nila nga dali maupaw ang mga kalalaken-an, tungod kay, kita n'yo, wala na og bisan unsa man nga pag-exercise aron nga madebelop ang mga muskulo diha—diha sa buhok, sa panit sa bagolbagol. Kita n'yo? Ug wala kini og pang-abag aron nga makakuha ang mga niini og dugo pasaka dinha. Dili na diretso maibomba ang dugo, kita n'yo, dili na mosaka ug maghatud og dugo. Siyempre, ang—ang ugat sa buhok mabuhi pinaagi sa dugo.

Ug karon makita nato nga kana nga bahin, nakita n'yo, wala na og unsa man nga lagpas pa sa mata.

¹⁵³ Karon hibaloong nato, “Motungha ang Kahayag” (sa mga tunga-tunga ba sa adlaw?) “sa panahon sa kagabhion!” Para ba sa unsa gipadala ang Kahayag? Aron makakita kamo kon diin kamo'y. . .kung unsaon ninyo paglihok-lihok sa palibot. Husto ba kana? Makita kung asa na ba kamo. “Mahitabo nga sa panahon sa kagabhion motungha ang Kahayag.”

¹⁵⁴ Karon, hisgotan nato kana karon ug ikumpara kini dinha sa Malaquias 4. Nagsaad Siya kaniadto nga magatungha pag-usab ang Kahayag sa panahon sa kagabhion, kita n'yo, “Kay, ania karon, akong ipadala kaninyo si Elias ang propeta, ug iyang pabalikon ang—ang mga anak ngadto sa mga amahan, ug ang mga amahan ngadto sa mga anak,” (husto ba?) “tingali unya ako moanhi ug samaran ko ang yuta pinaagi sa usa ka panghimaraut.”

¹⁵⁵ Karon maghisgot kita sa Juan o. . . sa San Lucas 17:30, ug tan-awon kung unsa ang gipropesiya ni Jesus dinha, nagaingon nga, “Maingon sa nahitabo kaniadto sa mga adlaw sa Sodoma, mamahimo kining mao ra. . . .”

Karon hinumdumi, himatikdi, kini maoy sa panahon nga igapadayag na ang Anak sa tawo; ang pagpadayag sa Anak sa tawo. Karon, ang Anak sa tawo sa tinuod potensiyal na kaniadto nga gipadayag, sa pipila lang ka minuto kaniadto, sa dihadiha nga wala pa gisunog ang Sodoma. Karon, kadtong Tawhana mao si Elohim. Ang Dios kadto; ug si Jesus maoy Dios. Ug ang Dios potensiyal nga gipadayag na mismo didto sulod sa pipila ka minuto, aron makigsulti kang Abraham, didto sa pagpangusisa para ngadto sa paghukom. Sa makadiyut lang kaniadto, nga gipadayag ang Anak sa tawo; ang Anak sa tawo, si Elohim. Makita ba ninyo kini, iglesia? [Nagaingon ang kongregasyon, “Amen.”—Ed.] Ang Anak sa tawo, si Elohim, gipadayag kaniadto sulod lang sa pipila ka minuto. Tungod kay, pagkasunod nga buntag mismo gisunog na ang Sodoma, (kanus-a?) sa wala pa kaniadto misubang ang adlaw pag-usab.

Busa wala na og organisasyon pa nga mabilin, ni magkaaduna man og dugang nga pag-usbaw kay sa kung unsa na ang nagakahitabo karon, kay pagasunogon na siya sa dili pa mosubang ang adlaw. Human na ang rebaybal, sa tibuok nasud. Wala na'y dugang pa nga mga rebaybal, dagku og makaylapon nga mga rebaybal; wala kini sukad gidawat sa niining nasud. Mahimong magkaaduna kamo og mga panagtigum pang-intelektuwal. Apan, ang pasabot ko, usa ka Espirituwal nga rebaybal, nakita na nato ang tanan niini. Nagalaum ako nga nasabtan ninyo kini. Ginasulti ko kini sa paagi nga—nga nagalaum akong masabtan ninyo kini. Kita n'yo? Human na kini.

Usa ka maayo nga ministro ang miingon, bag-ohay lang, miingon, “Igsoong Branham, kung maangkon ko lang gayud ang kalipay nga iya sa Ginoo sa akong kasingkasing!”

Ingon ko, “Anak, tapos na ang rebaybal.” Kita n'yo?

¹⁵⁶ Karon ang mga pangpalig-on gipangtaud na diha sa barko. Ang dagku og makahahadlok nga mga balod ania na sa atong mga atubangan; apan nasayod kita, nga sa likod lang nianang balod, duol na kita sa baybayon. Kita n'yo? Haduol na kita

sa baybayon. Magpabilin lang nga lig-on. Magpabilin lang sa Pulong. Magpabilin sa Dios. Bisan unsa pa ang ginabati ninyo, unsa pa man; magpabilin gayud sa Pulong. Tugoti—tugoti—tugoti kini nga magpabilin nga lig-on, sa diha nga makita ninyo kining dagku kaayong mga daan na nga mga dag-um sa palibot nato, ug ang nagaabot nga unos, ug mga bombang atomika, ug tanan nang uban pa nga ilang ginahisgotan. Apan ang atong pangpalig-on anaa mismo diha sa Pulong. Nag-ingon ang Dios nga maania kini; patigbabawan nato ang ibabaw sa matag usa niini. Oo, mapapaibabaw mismo kita sa mga niini. Oo, sigurado gayud! Sila, dili nila kita mahimong lunoron. Dili kita mahimong lumsan. Ibalhog ninyo kami diha sa lubnganan; pagawas kaming mangabanhaw. Ingon niana lang kini. Wala og unsa man nga paagi sa kalibutan nga magpapabilin kanamo dinha. Patigbabawan namo ang matag usa sa mga niini, tungod kay ang halangdong Pinaka-Kapitan namo nagapanawag na didto sa pikas dapit.

Nakaangkla na kita kang Jesus, pakigbisogan
ko ang mga unus sa kinabuhi;

Nakaangkla na ako kang Jesus, wala ako'y
gikahadlokang nga hangin o balod;

¹⁵⁷ Unsa pa man kini, pasagdi kini nga moabot. Unsa man ang mahimong mahitabo, unsa man ang mahitabo, wala kini kabilangan. Nakaangla na kita mismo diha kang Jesus. Kung mabuhi man ako, magkinabuhi ako ngadto sa kahimayaan sa Dios. Kung mamatay man ako, nan mamatay ako ngadto sa kahimayaan sa Dios. Ako—ako—basta gusto ko lang. . . Para sa kahimayaan sa Dios, maoy kung unsa ang gusto kong buhaton. Pagnatapos na kini tanan, dili ko na gustong magpabilin pa og dugay. Gusto ko nang moadto kon diin. . . ngadto sa akong ganti nga Iyang gipalit alang kanako; dili sa kung unsay akong nakabot, kondili sa kung unsay Iya nang gipalit para kanako, kung unsay Iyang gihatag kanako tungod sa Iyang grasya.

¹⁵⁸ Busa makita nato ang pang-gabiing Kahayag dinhi. Ug unsa ma'y kapuslanan kung aduna ka'y Kahayag, kung wala naman kamo'y mga mata aron makita kung unsaon paglihoklihod sa palibot Niini? Unsa man ang pang-gabiing Kahayag? Nagaabot ang Kahayag, aron magpadayag og usa ka butang. Husto ba kana? Kung aduna og unsa man *dinhi*, mabati mo ug dili mo masabtan kung unsa kini, diha sa kangitngit, kung ingon-ana pasigaha ang suga. Kini maoy aron magpadayag! Unsa ma'y pagabuhaton sa Malaquias 4? Kita n'yo? Buhaton ang mao rang butang. Unsa ma'y pagabuhaton sa pag-abli sa Pito ka mga Selyo, kon diin ang mga denominasyon nangalibog diha niini. . . ? . . . Magpadayag, magpahayag. Kung wala kamo og unsa man nga mata, unsa ma'y kapuslanan sa pagpadayag? Kinahanglan aduna gyu'y mga mata, una, aron makakita. Husto ba kana? Aron mahipadayag ang Malaquias 4, mahipadayag ang

San Lucas 17:30, ang San Juan 14:12, ang Juan 15:24 usab, 16:13. Ug aron ipadayag usab ang Pinadayag 10:1 ngadto sa 7, ang pag-abli sa Pito ka mga Selyo, ug ang Mensahe sa ikapito ka manolunda; aron mag-abli, aron magpadayag, sa diha nga moabot na ang pang-gabiing Kahayag. Karon kung ang usa ka tawo . . .

¹⁵⁹ Diha sa Kapanahonang Laodicea, (unsa na?) ang mga tawo “hubo,” Mao ba gyud sila? “Buta.” Unsa ma’y mahimong kaayohan sa Kahayag ngadto sa usa ka buta nga tawo? Kung agakon man sa buta ang buta, dili ba nga mangahulog man silang tanan diha sa gahong? “Hubo, buta, ug mga wala nahibalo niini.” Bisan gani ang ilang mga galamhang pangutok wala na, ang ilang mga galamhang esprituwal sa pangutok, esprituwal nga pagsabot. Kita n’yo?

“Mga gahi’g ulo, hambugiro, mahigugmaon sa mga kalingawan labi pa kay sa paghigugma sa Dios; dili-malukmay, tigbutang-butang, dili-mapugnganon, ug dili-mahigugmaon sa maayo; nga nagabaton sa dagway sa pagkadiosnon, apan nagapanghimakak sa Gahum niini.” Ang gahum sa kapadayagan; wala gani nila ginatoohan kini. Kita n’yo? Wala sila nagatoo sa ingon-anang mga butang sama sa mga propeta. Ug busa wala sila nagatoo niini. Nagatoo sila nga—nga ang Malaquias 4 mamahimong usa ka iglesia o usa ka organisasyon.

Sa dihang mianhi siya sa unang kahigayonan, usa siya kaniadto ka tawo. Sa dihang miabot siya sa ikaduhang higayon, nga may pinilo nga pahat, usa siya ka tawo. Sa diha nga miabot siya sa porma ni Juan nga Bautista, usa siya ka tawo. Kita n’yo?

Sa kaulahiing mga adlaw, sa diha nga magasugod na sa pagsidlak ang pang-gabiing Kahayag, mangabuka ang mga mata ug makita na ninyo kung asa na kamo paingon. Dayon ang Lawas naporma na, nga nagatindog na, nga nagalihok, nagalihok pinaagi sa Balaang Espiritu. Unsa? Ang maong Usa nga milihok kaniadto diha sa mga propeta nga nagsulat sa Biblia, ang mao rang Espiritu Santo nga nagalihok diha sa usa ka Lawas nga puno sa Espiritu Santo, naglihok pinaagi sa Espiritu Santo, pagawas gikan sa matag organisasyon, matag banay, sinultihan, ug gikan sa mga tawo.

¹⁶⁰ Ang usa ka babaye dinhi, dili siya nahisakup sa niining organisasyon, o nagagikan man sa niini nga organisasyon . . . nahisakup sa niining kongregasyon. Gikan siya sa ubang lugar, ug mitambong siya niining buntag, aduna siya og usa ka retrato dinha. Iyang . . . gihatag kini sa anak kong lalaki, nga nakurat gyud og ayo. Wala ko kabalo kung nakadungog na ba gyud siya bahin Niini o wala pa. Wala ko kabalo. Aduna siya og usa ka retrato sa niining Manolunda sa Ginoo nga anaa sa Pito ka Mga Kapanahonan sa Iglesia, niadtong nabuksan nga Pito ka mga Selyo, didto, sa dihang nahitabo kadto. Miingon, nga paglingi

niya didto, ug nakita niya kadto nga atua sa kawanangan, diha sa usa ka damgo. Ug gitan-aw niya balik didto ug nakita kadto, may nakita siyang nakaputi, nga nagamartsa; ug sa likod niini, ingon niya nga mora og. . . Miingon, “Igsoong Branham, ikaw gyud kadto.” Ug miingon, “Nagamartsa ka didto,” ingon pa, “sa likod mo, mga tawo nga magkalahi ang kolor, nagadala og mga bandera; Georgia, Alabama, tanan na nga nagkalinlaing matang sa mga lugar, nga nagamartsa paabante,” paingon na sa pagka-ulo kon diin nga gipadayag si Cristo ngadto sa pananawon. Oh, alleluyah!

¹⁶¹ Ania na kita sa kaulahiing mga adlaw, ug sa kaulahiing mga takna sa maong mga adlaw. Makita ba ninyo Siya karon diha sa Iyang Pulong, ug ang tanan sa Iyang Pulong nga nadayag na gayud mismo sa atubangan nato? Oh, Iglesia sa buhing Dios, pagtindog mo, toohi Siya uban sa tanan-tanan nga anaa sa inyo. Panggunit sa nianang gamay nga Lingin nga anaa sa tunga sa mao nga lingin, tugoti Kini nga lig-onon Niini ang matag pag-irog ug matag lihok nga pagabuhaton ninyo. Ang matag panghunahuna nga aduna kamo, hinaut nga pagakontrolon kini sa Tore nga anaa sa kinasuloran ninyo. Tungod kay, ang Dios anaa na mismo diha sa Iyang Pulong sa niining kapanahonan, diha sa pang-gabiing Kahayag, nga ginapasidlak ang mao nga Kahayag.

¹⁶² Ang pagkabuta gayud sa usa ka kabog! Magpasiga ka og usa ka suga, ug ang kabog—mamahimong buta kaayo ang kabog nga dili na siya makalupad. Ang nagatingog nga mang-ak, tanan kadtong libodsuroy matag gabii, ug mga butang nga sama niana, mga uk-uk ug nianang mga butang, dili makakita pag-adlaw. Wala sila nakahibalo bahin sa kung unsa kini. Dili sila makakita.

Ug nagadan-ag na ang pang-gabiing Kahayag. Ang matag samingay, asa man kita moadto, sa kinaiyahan, sa Biblia, sa—sa mga estatwa nga si Melc- . . . nga nakita ni Daniel, ug—ug ang hari niadtong panahona, nakita nilang tanan; ug ang tanan niining mga butang, ang matag usa, matag porma, matag lihok, matag puwesto diha sa Lawas, ginapakita kanato ang mismong panahon nga atong gikapuy-an. Wala na’y usa pa ka kalihokan nga mahimong moabot human niini.

Nagkaaduna na og paglihok sa kamot; gugma, si Wesley. Aduna na’y paglihok, ang pundasyon, si Luther. Gugma, wala na’y usa nga mas molabaw pa; gitawag kadto nga kalihokang Wesley. Nagpadala sila og mga misyunero sa tibuok kalibutan. Usa sa pinaka-halangdong kalihokan nga gibuhay kaniadto, sa kapanahonan sa wala pa kadto.

Dayon miabot ang kapanahonang Pentecostal; kung ingon-ana misulod ang nagkalinlaing mga tudlo ug ingon-anang mga

butang, ang kapanahong Pentecostal, bahin sa mga dila, ug ilong, ug uban pa.

Karon ania na kini diha sa mga mata. Unsa ma'y kapuslanan nga manginahanglan kamo og mga mata, o manginahanglan og kahayag, kung kana nga mga mata wala man dinha aron makakita? Kinahanglan nga magkaaduna og mga mata, usa, aron makakita. Ug sa diha nga miabot na kana, Iyang gibuksan ang Pito ka mga Selyo ug gipadayag ang pang-gabiing Kahayag, gikuha ang tanang mga tinago nga gililong sa tanan niining mga kapanahonan sa iglesia, ug gipadayag ang mga niini karon sama sa Iya nang gisaad diha sa Pinadayag 10:1 ngadto sa 7. Ania na kita karon nga nakapuwesto sa taliwala sa Pulong, ug ang Pulong ingon nga ginapadayag kanato ni Jesus Cristo. Kung ingon-ana, *Kini* maoy Pulong sa Dios.

¹⁶³ Ug mamahimo nga Iyang mga sakup, magalakaw kita kinahanglan nga duol sa Tigsulat, aron masabtan Kini, aron nga magpadayag Kini. “Oh Ginoo, unsa ba ang buot Mo kanako, buot nga buhaton ko? Kinahanglan ba nga moadto ako sa mga pagmisyon ug magwali sa Maayong Balita, o kinahanglan ba nga magpuyo lang ako sa balay? Bisan unsa man kini, kung kinahanglan ko nga mamahimong usa ka maayong asawa, kung kinahanglan kong mamahimo nga usa ka maayong inahan, kung kinahanglan ko bang buhaton *kini*, *kana*, o *uban pa*? Unsa man kini, kung kinahanglan nga mamahimo akong usa ka mag-uuma, kung ako'y . . . Unsa man kini, Ginoo, unsa ba ang buot Mong ipabuhat kanako?”

¹⁶⁴ Dili ba mao kana ang gituaw ni Saulo didto, “Ginoo, unsa ba ang buot Mong ipabuhat kanako?” Didto siya kaniadto sa ig- . . . sa iyang dalan didto aron—aron ibalhog ang tanang iglesia ngadto sa bilangguan. Apan sa dihang misinggiti siya, “Unsa ba ang buot Mong ipabuhat kanako?” Sa diha nga misidlak ang Kahayag didto, ingon nga usa ka Haligi nga Kalayo nga nagapaibabaw kaniya didto. “Unsa ba ang buot Mong ipabuhat kanako?”

¹⁶⁵ Sa hunahuna ko usa kana ka maayong pulong sa pagtapos, ug moingon, “Ginoo, unsa ba ang buot Mong ipabuhat kanako? Sa diha nga makita ko kining Kasulatan nga hingpit na gayud karon nahipadayag; Ginoo, unsa ba ang buot Mong ipabuhat kanako?”

Iduko nato ang atong mga ulo.

¹⁶⁶ Ginahangyo ko ang matag usa dinhi sa pagsusi sa inyong mga kasingkasing karon ug isulti kana nga pangutana, “Ginoo, unsa ba ang buot Mong ipabuhat kanako?” Ug kamong mga tawo, kung anaa pa kamo dinha sa gihapon sa mga telepono sa tibuok nasud, iduko ang inyong mga ulo ug pangutan-a, “Ginoo, unsa ba ang buot Mong ipabuhat kanako? Ang makita nga ania na kami sa kaulahiing mga adlaw ug sa kaulahiing

mga takna, nga ingon na ka eksakto gayud sa atubangan namo, klaro kaayong nahipadayag na, unsa ba ang buot Mong ipabuhat kanako?"

¹⁶⁷ Minahal nga Dios, samtang nga ilang ginapangutana Kanimo kana nga pangutana; akong ginapangutana, ako mismo, dinha Kanimo, unsa ba ang buot Mong ipabuhat kanako, Ginoo, sa dihang naamgo ko nga mahinungdanon gayud ang matag adlaw. Ug nagaampo ako nga tabangan Mo ako, Ginoo, nga mabuhi aron nga ang matag adlaw, mapahinungod alang sa Imong kadungganan ug kahimayaan.

Nagaampo ako nga Imong tabangan ang matag usa nga anaa sa tibuok nasud, ug kining mga ania dinhi sa tabernakulo samtang nga among ginasusi ang among mga kasingkasing ug nagaingon, "Ginoo, unsa ba ang buot Mong ipabuhat kanako? Unsa ba ang mahimo kong buhaton, Ginoo, nga mapakaylap pa ang Imong gingharian ug ang Imong Katuyoan?" Itugot kini, Dios.

Susiha kami, ang among mga kasingkasing, ug sulayi kami. Kung aduna og unsa man nga kalapasan diha kanamo, Ginoo, unsa man nga kahakogan, unsa man nga dili maayong mga motibo o tumong, Oh Dios, hinloi kami pinaagi sa Dugo sa Imong Anak, si Jesus Cristo, nga mapainubsanon namong ginadawat ang Iyang halad pasig-uli sa Iyang kamatayon ug sa Iyang pagkabanhaw. Ug ingon nga napamatarung na pinaagi sa pagtoo nga Iya nang gibuhat kini, malipayon namong ginadawat ang mao nga plano sa kaluwasan nga Imong gikahatag kanamo, para kanamo.

Amahan, ginapasalamat Ka namo tungod sa Mensahe sa niining panahon, kung unsay among ginatoohan ug kung unsay among ginagunitan, ang mahibaloan ug toohan nga Imo kining Pulong ug Imong Mensahe. Dili aron nga mamahimong lahi sa ubang tawo, kondili aron sa pagpaninguha nga mamahimo pa nga sama gayud ni Jesus Cristo nga mao ang among panig-ingnan.

¹⁶⁸ Minahal nga Dios, ania ang mga panyo, ug adunay mga tawong masakiton sa kung asa na lang. Ug ako mismo, Ginoo, kapoy na gyud ug hago na, niining buntaga. Nagaampo ako nga Imo kaming tabangan, minahal nga Dios. Nagasalig kami para sa Imong kusog. Ikaw ang among Kusog. Mitabang Ka na sa daghan kaayo, minahal nga Dios.

¹⁶⁹ Sa miaging adlaw, nahunahuna ko didto sa mga kakahoyan, nga nagalakaw didto uban si Igsoong Banks Wood, sa diha nga ang mga doktor. . . Grabe na kaayo ang iyang kasingkasing nga dili na siya makalakaw-lakaw. Dayon sa paghunahuna ko kung unsaon ko. . . wala ko kabalo didto, nga sa paglakaw didto sa mga bukid human niadtong panan-awong, "Kinahanglan kong

makuha kana nga leon. Kinahanglan ko nga makitang mapatay kana nga leon.”

Ug dayon sa pag-adto ko didto, ug didto na ako sa Tucson, sa Furr’s Cafeteria, ug makita ang nangaluag na niyang mga sinina, ang iyang mga mata nga nanglusà. Miingon, “Dios, kung mahimo Mong magpakita og usa ka panan-awon, kung asa na ang leon, siguradong mahimo Mong ipakita ang mahitungod kang Igsoong Wood.”

Ug dayon miabot kini, “Ipandong mo ang imong mga kamot diha kaniya.”

Ug ania siya karon, nga nakabalik na, ang among Igsoong Banks nga mibalik na nga, mahimsog, magdagan-dagan na didto niadtong mga bukid. Daw sa unsa Ka namong ginapasalamat, minahal nga Dios. Ikaw ang mao ra nga Dios para kanamong tanan sama sa kung unsa Ikaw para kang Igsoong Wood. Nasayod ako nga gihigugma Mo siya, tungod nga Imo siyang alagad, nga matinud-anon ug sinsero.

¹⁷⁰ Ug nagaampo ako, minahal nga Dios, nga makigharong Ikaw sa matag usa kanamo, ug pasayloon ang among mga sala, ug ayohon ang among mga balatian diha sa among mga lawas. Himoa kami nga mamahimo pa nga sama Kanimo, sa adlaw-adlaw, Ginoo, hangtud nga modangat kami sa nianang hingpit nga gitas-on sa kahupnganan ni Jesus Cristo. Itugot kini, Ginoo. Nagasalig ako nga Imo nang gisusi ang matag kasingkasing, karon, ug nga nasayod na kami kung unsay buhaton. Ginahangyo namo Kanimo nga panalanginan Mo kami karon, diha sa Ngalan ni Jesus.

¹⁷¹ Ug samtang nga atong giduko ang atong mga ulo, aduna ba dinhi karon, o diha sa—diha sa mga nakakonekta sa telepono sa tibuok nasud, nga gusto gayud, samtang nga nagaampo kamo, ug nagduko ang inyong ulo, ipataas lang ang inyong kamot sa Dios karon. Ingon niana lang ang mahimo ninyong buhaton; nagpunsisok kita dinhi karong buntaga. Ipataas lang ang inyong kamot ngadto sa Dios, ingna, “Dios, himoa akong mamahimo pa nga sama ni Jesus. Ako—gusto kong mamahimo pa nga sama ni Jesus.” Panalanginan ka sa Dios. Dinha sa mga lugar sa tibuok nasud, nga kamot nga mipataas diha sa tanan nang dapit, kadaghanang nagkahiusa gayud. Nakataas, usab ang akong kamot. “Gusto kong mamahimo pa nga sama Kaniya. Susiha ako, Ginoo, ug hibaloa kung aduna ba og unsa man nga kadautan kanako; tangtanga kini. Ako—gusto kong. . .” Unsa? Nadugayan gyud kita dinhi, pero bisan pa niana manghawa kita bisan pa nga kamo’y . . .kung kamo bay, bisan unsa pa kamo, unsa man ka dato, unsa man ka kabus, unsa man ka batan-on, unsa man ka tigulang.

¹⁷² Sa didto ako kagahapon sa usa—usa ka gamay, kabus nga pundok sa mga tawo didto sa taas sa bukid, didto sa . . . didto

sa sapa nga dapit. Adunay usa ka gamay nga pamilya didto, usa ka lalaki nga dugay nang ginasultihan mahitungod sa Dios, dugay na. Miadto ako, ang iyang luoy nga asawa, pito o walo ang mga anak; ang maong lalaki, nga usa ka gamay kaayo, maniwang nga tawong, atua didto nga nagapaningkamot nga magtrabaho, sa pipila lang ka dolyares kada adlaw. Ug usa ka tawo ang nagpapuyo kanila didto sa usa ka gamay'ng payag-payag. Ug didto ang iyang asawa sa itaas, nga halos hapit na nga manganak pag-usab, ug aduna kini og usa ka dakung wasay didto, nagabugha og kahoy, aron nga maguyod kini paubos; dala-dala ang usa ka bata diha sa iyang bat-ang, ginaguyod ang kahoy diha sa usa pa ka kamot; mokanaug didto aron bughaon kana nga kahoy, para makapagtigum og pipila ka mga blackberry, para dili magutman sa panahon sa tingtugnaw. Sus, daw sa unsa gayud ang kalooy namo sa maong babaye! Si Igsoong Wood ug ako mibalik ug gikuha ang truck, ug miadto didto ug gibugha ang iyang mga kahoy, ug gidala kini didto. Ang maong asawa, ang mapasalamaton nga luoy'ng babaye, nagtindog didto. Nalooy gyud ako kaniya. Ug padayon kami nga nagaampo para kanila.

¹⁷³ Ug nagka-epilepsy ang gamay niya nga bata. Miadto kami ug nag-ampo alang sa maong gamay nga bata, ug giayo kini sa Dios. Ug sa miaging adlaw, nagkaaduna og hernia ang iyang bana, ug misulod kami. . .

Dugay na akong nakigsulti kaniya. Nagapanigarilyo siya, pareho silang duha. Tabako ang gigamit sa babaye, ug mao usab ang gigamit sa lalaki, kinaiyanhon kini sa mga tawo sa bukid. Ug dayon padayon akong nakigsulti kanila bahin niini. Ug kagahapon sa buntag pagbisita ko, mga banagbanag na, ania ang maong lalaki nga migawas, nagkagunitay ang iyang mga kamot, ug miingon, “Igsoong Billy, usa na ako ka gibag-o nga tawo.” Ingon niya, “Napanigarilyo ko na ang kaulahian kong sigarilyo, ug ania na ako dapig sa Ginoo.”

Ingon sa babaye, “Napanigarilyo ko na ang kaulahian kong sigarilyo, usab.”

Oh, itanum lang gayud ang binhi! “Ako ang Ginoo nga nagabisbis. Pagabisbisan Ko kini sa adlaw ug gabii, tingali unya pagaagawon kini sa uban gikan sa Akong mga kamot.”

¹⁷⁴ Oh Dios, malooy Ka karon, nagaampo ako, ug ihatag kanamo ang mga tinguha sa among kasingkasing, tungod kay sulod sa among mga kasingkasing gusto namo mangalagad Kanimo. Karon, Amahan, anaa na sila tanan diha sa Imong mga kamot, sa asa man nga dapit sila. Imo silang mga anak. Makigharong Ka kanila sumala sa Imong kalooy, Ginoo; dili sa paghukom, kondili sa kalooy. Amo kining ginapangamuyo sa Ngalan ni Jesus. Amen.

¹⁷⁵ Gihigugma ba ninyo Siya? [Nagaingon ang kongregasyon, “Amen.”—Ed.] Sa tibuok ninyong kasingkasing gayud! Karon, kamo nga may mga panyo dinhi, mahimo na ninyong makuha.

Ug karon, ang atong mga panerbisyo, siguro magasugod ang mga niini medyo mas sayo, sa alas siete, og mga ingon niana. Ipahibalo kini ni Igsoong Neville, sa makadiyut na lang, kung mga kanus-a kini mosugod.

Aduna ba’y bautismo, siguro, karong buntag? [Nagaingon si Igsoong Neville, “Nahiandam na ang tubig.”—Ed.] Nahiandam na ang tubig, kung aduna man dinhi nga wala pa nabautismohan sa Ngalan ni Ginoong Jesus Cristo, aba, siguradong kini. . . Nahiandam na ang tubig para sa panerbisyo pang-bautismo.

¹⁷⁶ Among ginapasalamatan ang tanang mga igsoong ministro. Makita ko si Igsoong. . . Kumusta na ang inyong panagtigum, okey ra ba, Igsoong Parnell? Ug si Igsoong Martin, ug, oh, pagkadaghan nila dinhi, si Igsoong Lee Vayle. Oh, aduna gyu’y ministro bisan asa niining dapit. Amo gayud ginapasalamatan ang inyong pagtambong dinhi, sa pagpakig-fellowship uban kanamo palibot sa Pulong.

¹⁷⁷ Tingali mahimong dili kamo mouyon kanako sa eksakto bahin Niini; dili ko man ginahangyo kini kaninyo, nakita n’yo. Ang butang lang, nga pamalandungi lang ninyo kini. Unsa man ang ginasulti ninyo kanako, ginapamalandungan ko kini. Kung mokuha ang mga ministro sa maong teyp, ug moingon sila, “Bueno, dili ko mouyon niini.” Okey ra kini, igsoon ko. Pastor kamo tingali sa ubang karnero; kamo—mahimo ninyo silang pakaonon sa unsa man nga gusto ninyo.

Ginapaninguhaan ko og ayo nga magpabilin sa Pulong, tungod niining mga gibutang diha sa akong mga kamot para sa Dios, tungod kay gusto sa karnero ang pagkaong pang-karnero, siyempre. “Ang Akong mga karnero nagapatalinghug sa Akong Tingog.” Ug dinha kita nagakinabuhi, sa matag Pulong nga nagagula sa. . . Dili tanan. . . Dili lang Pulong sa karon ug kaniadto; kondili sa matag Pulong nga nagagula sa baba sa Dios, dinha kinahanglan magkinabuhi ang mga balaan.

Manindog kita karon. Samtang nga atong ginaduko ang atong mga ulo. . .

Ug Igsoong Neville, aduna ka ba nga gusto mong isulti kanila? [Nagaingon si Igsoong Neville, “Wala.”—Ed.] Igsoong Mann? Sige.

Maayo ba ang gibati sa tanan? Mag-ingon, “Amen.” [Nagaingon ang kongregasyon, “Amen.”—Ed.] Sige.

Karon iduko nato ang atong mga ulo.

Pagahangyoon ko si Igsoong Lee Vayle kung puede siyang mosaka dinhi, o kon mahimo niya. Kung makaanhi ka unta, Igsoong Vayle, kon mahimo mo.

Atong igsoon dinhi si Igsoong Vayle, usa ka manunulat sa mga libro. Ug ginaandam na niya ang libro karon, *Ang Pito Ka Mga Kapanahonan Sa Iglesia*, ug ginabuhat na *Ang Pito Ka Mga Selyo*. Ug nagalaum kita nga dili magdugay mapagawas na nato kini. Sige. Igsoong Lee Vayle.

Panalanginan kamo sa Dios.



SI CRISTO NADAYAG DIHA SA
KAUGALINGON NIYANG PULONG CEB65-0822M
(Christ Is Revealed In His Own Word)

Kining Mensahe ni Igsoong William Marrion Branham, una giwali sa Ingles niadtong Domingo sa buntag, Agosto 22, 1965, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2015 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org